







省齋文藁卷第十六

周益文忠公集十六



題跋三

跋劉仲威蘭亭叙

晉人風度不凡于書亦然右軍又晉人之龍鳳也觀其  
 鋒藏勢逸如萬兵銜枚申令素定摧堅陷陣初不勞力  
 蓋胸中自無滯礙故形于外者乃爾非但積學可致也  
 昔梁昭明以一語不中廢此叙而不錄後世因以絲竹  
 管絃為重複之病至齊梁小兒偽妄之作則信而不疑  
 是蓋以微瑕棄玉而以玉表重珉也唐太宗親傳晉史  
 備載斯文豈無意耶雖然翰墨如此閱千百載終當輝



映學海後之覽者亦將有感于此固右軍期望于士大夫之志也故吾樂為仲威言之紹興乙亥九月二十七  
日書

跋周德友所藏蘇養直詩帖

後湖居士歌詩清腴蓋江西之派別而字畫健逸又老坡之苗裔也吾宗德友丈寶其遺墨殆且百紙可謂富矣僕生也後不及從居士游今以德友數十年染指之勤一旦得大嚼為正使親見揚子雲所獲未必如是之富也欣玩彌日拱揖不暇姑識歲月而歸之紹興戊寅十二月既望

跋宋景文公墨蹟

柳子厚作司馬刺史詞章始極其妙後世益信窮人詩乃工之說常山景文公出藩入從終身榮路而述懷感事之作徑逼子厚贈楊憑等詩自非機杼既殊經緯又至安能底此殆未可以窮達論也紹興三十年二月二十一日

外祖母淑國夫人元憲公之孫也家世鼎貴而學道甚切平居遠紛華臨終不憚化其為兒童時所見如此今讀兩公家問其相與論夢幻輕外物至矣乃知淑國淵源蓋有所自紹興三十年十二月二十一日



跋劉子澄曾祖帖

大中大夫劉黻思父與原父貢父兄弟也少嘗令桐廬元豐庚申復來守睦歲久事逸而邦人猶能頌其清白董氏圖經實載之紹興壬午其曾孫左迪功郎靖之清之得李尚書公擇帖將刻石烏龍山中公擇仕久且顯

薨也甥黃魯直為哀賻贈賈所服帶僅能經紀家事平生清白身後益見清白所以脩身也身脩則無不治矣思父真公擇之友哉是宜持書使來者知為吏之本

柴翼秀才著書求跋語

三衢柴鴻舉著易索隱若干卷莠言四卷可謂勤且博

矣夫談禪不必病戒律用兵不必廢行伍講解會粹之學有功于道豈少哉子夏曰日知其所止月無忘其所能此鴻舉之志也故為發明之紹興三十二年閏二月一日

跋中書舍人趙莊叔字

莊叔書此數語所謂非苟知之亦允蹈之者年四十死矣或謂養生為無益蓋非也莊叔若不作記天上則當脩文地下耳紹興壬午閏二月二十五日

跋宗室士奎所書周以宗強賦

漢二獻皆以好書聞故傳國亦皆最久彼其遺子孫者



固有致之矣今賀王不惟金譜玉局是務而牧：短  
檠佔畢間無惑乎文章盛于王門而餘澤遠及苗裔也  
僕少時應舉覓官乃未嘗手抄一賦見此不覺汗下壬  
午十月十四日

跋湖州沈壽岡之祖墓銘後

錢蒸撰

志墓有美而無箴久矣然東坡謂錢翰林陳義崢嶸不  
少自貶則其所以稱寺丞其諸異乎人之稱者與隆興  
元年正月二日

跋平江張漢卿推官華山就隱圖

洞庭楚之巨浸而山乃在震澤中其產橘柚皆足以冠

天下世謂地脉潜通宜哉太華之峰有玉井：之蓮十  
丈自古記之矣今吳郡有華山：有天池：嘗有異蓮  
其地脉亦洞庭比與儒者知禹貢職方氏必以斯言為  
疑安知造物之視方輿直塊土耳况區：秦吳間相去  
殆不能以寸復何疑哉誰能補圖經之闕願以是告之  
隆興元年四月十一日

跋羅良弼家歐陽公唐草贊

長卿好古博雅藏本朝名公帖至數十百紙以那為首  
不在此藁乎隆興癸未十二月九日

跋宗室世能與教授閻立仲和帖



周益公集 卷之六  
孝穆公宗室祭酒而敬愛儒者如此子孫其有不樂善者乎一傳為安定郡王表之遂以才名發聞于世今忠訓即子從公之諸孫也醇雅好書驟見之疑其為寒士尚寶此帖籛金可散此不可失也隆興二年五月十一日

跋黃承議宗諤所藏文潞公劄草老韓師朴諸

公題顏魯公懷素書

予往在館閣凡古今法書盡見之而魯公祭濠州刺史文懷素書皆在焉嘗以告少監刻為中興法帖數十卷使學士大夫盡得寓目亦一段奇事諸公雖然予言而

未暇也黃君廷老蓄元祐名卿二跋久矣今歸會稽道行闕盡以是告有位者乞并刻之殆將補商頌之亡合豐城之劍耶隆興二年五月十七日

跋黃廉夷仲行狀

熙豐元祐人才參辰相避冰炭不相入其或毀譽兩忘者非棲遲下位而不與事則脂韋其間而不任事者也給事中豫章黃公在熙豐時實任御史將使指在元祐時則掾公府踐禁省出入要劇獨無間言其致此必有道矣昔予外祖安陽王公脩恭陵正史閱五年于公列傳或與筆削焉紹興辛巳予攝太史牛馬走訪求故史



已亡三篋而新史殊未殺青惟得公行事于新舊實錄  
而叅校山谷十詩如金門戰袍之語猶未盡解也奉祠  
歸廬陵適公之孫季文為郡丞始見山谷所作行狀然  
後知公所以被遇兩朝終始如一者忘已徇公中立不  
倚故也季文謂山谷詩已載集中而行次止藏于家欲  
與舊傳并刻之非特脩史氏他日採擇亦使後生知前  
輩立朝本末如此予贊曰明著祖烈古人以為崇孝山  
谷斯文黃氏之鼎銘也可無傳耶季文因請題其後隆  
興二年十月十五日

跋劉原父貢父家書

前輩日遠公是文集僅有蜀本而公非全書學者或未  
盡觀况其遺墨尺牘豈易得耶吾友子和子澄公之從  
曾孫也樂道嗜學篤行能文寶此數帖非特如鄭公之  
笏而已要湏挺：有其風烈乃無愧耳惜二先生皆以  
忠厚爾雅之文雋明邁往之氣事累朝為名臣然不得  
一直玉堂議者惜之不在其身予于二君深有望矣隆  
興二年十一月十五日

又跋原父貢父仲馮帖

此墨莊寶章集也更數百年學者讀三劉漢書而思其  
人或於蛛絲煤尾中觀此帖宜如何愛慕耶隆興二年



月盈公集 卷之六  
閏十一月二十三日同家兄子友子中胡季懷道從季  
觀于永和本覺寺而歸之子澄父

跋蘇子由和劉貢父省上示座客詩

集中觀詩難為詩猶群姝中觀色難為色也吾友陸務  
觀當今詩人之冠冕教勸予哦蘇黃門詩退取栞城集  
觀之殊未識其旨趣甲申閏月辛未郊居無事天寒踞  
爐如餓鳩劉友子澄忽自城中寄此卷相示快讀數過  
溫雅高妙如佳人獨立姿態易見然後知務觀于此道  
真先覺也掖垣故事最重省上及題名禮項予綴蛾眉  
班後會張夔州真父初拜三字老吏持供職牒請舍人

署舍人涉筆從之次則府史廳吏以狀交展而已開宴既無  
近事題名初未具石而憂責叢併唱酬亦廢我思古人  
豈獨歎其筆力哉

跋劉仲馮與斯立宣德帖

西樞劉公為從官時丞相劉忠肅公實在政府觀元祐  
施設則二公立朝本末益可考矣紹聖間忠肅既被晉  
昭之誣貶死新州樞公亦坐朋黨謫柳久之會靖國改  
元忠肅之子跋始能辨雪父冤卜明年正月以丞相禮  
葬公于鄆之須城而樞公來守適在靖國之冬故有春  
首襄事旦夕前慰等語未幾國是一變死者奪生者徒



前帖所謂搢紳之禍者猶未已也昔漢末奄官用事欲  
掃除善類濁亂帝室以謂人誣以過則辭費而易窮各  
議其罪則罰輕而弗徧故創為黨論以網羅之識者所  
宜寒心萬世所宜絕口也宗觀用事之臣忍復以姦黨  
為名錮人于聖世乎彼徒欲誣害者廣不暇為國計而  
不思以士大夫竊奄宦之緒餘為可重羞也悲夫後六  
十三年樞公族孫子和子澄携此帖相遇因題其後斯  
立劉跋字也

跋蕭御史薦宗室世疇奏狀藁

蕭任三宮教授

某往聞大觀御史蕭公特搽如松筠不以時宰風指輕

重詔獄九原雖遠直氣凜然今讀薦宗室孝穆公書又  
知好賢獎善出于天性要之此公任職居官無不盡其  
心非為神羊在首一時以決獄為剛也此藁初藏友人  
胡季懷家會孝穆諸孫從季與季懷遊遂以歸之季懷  
此心蕭公獎善之心也執柯伐柯從季豈以為遠哉圖  
為似是而已蕭公諱服字昭甫吉水人隆興乙酉歲旦  
試毗陵吳祺筆

跋山谷發願文

此書藏河陽李彥將家豪勁端重所謂入顏揚鴻雁行  
者今已刻石廬陵郡齋然可傳者位置形勢而已若乃



濃淡纖妍體備衆妙則副墨之子亦如佩夫子象環耳  
乾道元年二月二十六日彥將自贛上來僕具脫粟請  
少留遂出示此軸獻豚蹄而得木車者耶

跋王平甫所撰王職方墓表

職方父子廬陵名士平甫兄弟四海文儒而此石壽未  
百年幾以貨泐予既用萬錢贖得之不敢復置王氏之  
所懼再鬻也他日游靖居上方得職方父子像于閣室  
壁間遂囑長老法宇表出之而立石于門右使來者得  
覽觀焉賢：善：誰無是心有官君子勿恃强有力而  
取之乾道乙酉

跋宗室子從藏前輩帖

國朝雍熙中詔改拾遺補闕為司諫正言然猶沿五季  
舊制未得守其官但以寄祿往：狀元登第者自匠丞  
再遷始得之其高選如此否則特勅許赴院供職乃曰  
諫官至天禧初又詔兩省別置諫官六員明道元年復  
置諫院然後名正而官備至今守之此帖不知遺何人  
計非廷魁即嘗供職諫院者文正公稱為長者必醇正  
人<sub>也</sub>乾道元年五月一日

故翰林學士錢公希白吳越廢王子也忠懿納六時一  
門鼎貴希白獨刻志讀書故啟有不求族蔭之語年十



七試御前三題立就以輕俊被黜故云妙齡試才中間  
雖簡在神功章聖之心然欲成就其才每三抑之年三  
十有二方登進士甲科故云晚歲得雋旋以內難解官  
免喪時當在咸平四年或五年于時呂文穆李文靖向  
文簡為宰相此必三家舊本特不知出于誰氏凡幾易  
乃至從季爾昔韓退之三書不能動時相而希白一啟  
遂召試改秩通守蘄春雖曰人主記其姓名且昂甲格  
當擢用然列聖抑揚有法大臣薦進無私皆可垂憲萬  
世予特詳言之亦使從季知公侯子孫自立如此得不  
見影而逝也哉

二蘇兄弟行如冰雪足以下照百世望如九鼎足以坐  
銷群姦學士大夫得其片文隻字輒藏去非以為榮蓋非  
特取其華藻也質翁帖是中年書南至帖疑叔黨輩代  
作寄米帖淵明詩道媚秀傑晚年精妙蓋如此黃門銘  
其兄云撫我則兄誨我則師讀戴公詩便知斯言為實  
錄

予頃官秣陵每令休必出白下過半山上鍾阜訪定林  
酌八功德水想公跨驢却蓋往來其間與寶覺行詳之  
徒遊其高風絕韻殆古今宰相所未有自非遺物離人  
而立予獨不能爾也至于談禪之病則山谷道人嘗喻



之龍蛇必有能辨之者

山谷翰墨毀棄于大觀政和間而中興之初搜訪甚急故散在士大夫家者浸少不然此公平平生喜為人作字仙去總數十年未應爾也往聞唐文皇畫收二王真蹟惟不取弔喪問疾者此帖得傳于世亦幾是耶

跋三蘇畫像贊

侍讀公贊蘇氏父子兄弟之盛游夏不能措辭矣英彥以示省齋周某乃續一轉語云是家一瓣香並為文忠公此圖盛行于廬陵宜也乾道丙戌五月十二日

跋此庵記

韓退之力排佛氏欲火其書柳子厚乃推尊之謂與易論語合浩初之序左右佩劍今攷二公心迹誰為善學展季者耶侍讀胡公平生未嘗啟梵夾效膜拜戲為證老作此庵記而辭理超詣便得儒釋之妙正使三十年默照坐破蒲團一萬里行脚踏盡草屨恐亦未能到此地位真今代退之也若子厚者風斯在下矣乾道丁亥二月十一日

題王龜齡石鏡谿詩碑後

予往與龜齡同在道山見其拒佛說過于揚墨及來廬山讀數詩皆食蔬笋帶葛藤韓退之決非大顛所能移



道一而已丁亥清明

跋劉季高與溧陽筆工顧綱帖

杼山老人筆精墨妙獨步斯世而顧綱之藝數見褒稱東坡詩中李文政也乾道三年八月辛酉

跋黃魯直所書金剛經

此經最貴徐柳所書今或漫或燔所可致者獨灌溪本但恨傳刻失真耳山谷遺蹟自當盛行于世故四明別駕陳篆藏而未刻者為其非全書也然經多複語類而次之計所欠無多山谷翰墨滿江南康廬又產樂石取諸人而補華黍攻他山而傳副墨斯無難矣此孝子慈

孫所宜勉也乾道丁亥十月二十三日敬觀于天池院

文殊亭魯直自題卷後云寫到此絹已盡亦可笑然觀已前九分筆弱終不成器可漫留與六郎學書

若兄須續當以驚溪白絹寫一卷他時寄上某再拜後又有跋云得李伯時畫須菩提乃求魯直書經已已表末叔和

跋上藍長老了賢所收張丞相帖

丞相魏公言訂千金義烈之稱二字師號也賢乎不朽矣乾道三十年十一月某日觀于豫章南浦亭

跋西山翠岩寺南唐保大中賜僧無殷詔書

李氏世敬沙門其賜書徧江左諸刹至于不失舊物如翠岩者鮮矣乾道丁亥十一月十三日同長老子堅觀



跋余安道題名後

上即位首命編類聖政所訪國朝勲臣後將祿之某與吏部侍郎凌公實奉行詔書未及條上會觸罪去今讀故人馮卿跋語及知始興襄公四世孫竟如初詔興滅繼絕天下之民所以歸心也尚有一說宜具為令凡勲賢之後所居州若縣籍其名氏遇三歲大比而不中選則別攷其德行道藝上之文武隨所肄有司按其家祿仕或闕則官優等者一人予以勸人自力于善毋忝厥祖亦使赴功趨事之臣歆慕跂及以燕其子孫且予三代貴重世胄之意為粗合某已收朝蹟無由發此議因

公聞孫出示手澤為書其後庶幾告有位者議而行之

乾道五年正月二十八日

跋王民瞻詩

人年八九十語必諄：雖衛武公未免蹈此懿戒最詳于二雅是也蘆溪丈人年至矣而詩益清壯簡古如揮魯陽之戈日可再中其壽豈易量耶安復隨高坐出示此篇知予非續貂手苦求跋語為題其後使携婦為丈人賀乾道丁亥正月二十二日

跋孫莘老告身

龍圖閣直學士高郵孫公夢奠僅八十年而曾孫浩鷄



衣菜色困于逆旅惟手携命書數通吾亦白眼賢者類  
矣既呼匠標<sup>標</sup>飾歸之因為記其歲月後有觀者考前輩  
立名節之難而思後人持門戶之不易必將有感于斯  
焉乾道戊子三月告朔

跋斛繼善所藏柳書千文

張長史草書以雄放名而魯公謂其模楷精詳最為真  
正乃知真生行：生草果有徵也斛使君家藏柳書千  
文予雖未能必其是否然筆勢雄放而法度精密如造  
父王良馭八駿駕輕車馳驟萬里其進退曲折未嘗不  
中規矩豈非書家之傑然者耶亦恐歐虞褚薛未必能

辦此耳乾道四年

跋安福令王隸所藏王介<sup>甫</sup>及其子渙之漢之沈  
之等帖

王公與荆文公同學眉山蘇公同科二公皆予以詩其  
人可知矣敬觀翰墨恨不同時也彥魯嘗從荆公學故  
手筆數字頗有橫風疾雨之勢乾道五年三月

校理公制策登科而官止祠部即中丞延康寶文兄弟  
乃同時位少常伯典大藩府不在其身在其子孫諒哉  
又跋歐蘇及諸貴公帖

尺牘傳世者三德爵藝也而兼之實難若歐蘇二先生



所謂毫髮無遺恨者自當行于百世

### 跋大臯渡永興觀舊碑

王儂諱子繇字大臯事迹著于廬陵玉山名山玉田名村嘉福之觀大臯之渡值夏之市皆是也參考碑識同謂飛昇于晉永嘉中而郡人蕙岷葛先生作嘉福觀記云故老相傳儂東漢喬之弟頗疑相去三百餘年特世俗附著之耳予按湘東王古今同姓名錄有六王喬其一晉廬陵太守以時與地攷之儂豈太守弟耶而大臯為渡畧見南史陳紀今俗謂儂擲篙而渡訛曰大篙此又妄之甚也永興距渡里許主者王道貴葺棟宇于廢

壞之餘侍讀胡公實紀其成尚有政和舊記頗叙歷代沿革碑漫矣詞僅傳道貴欲併刻之而患文不雅馴或曰無傷也侍讀之文江海也豈必廢濫觴哉道貴因求跋語予嘗自郡城涉江東行二里入洞元觀問賜額何時道士出大中祥符中牒視之殆創于南唐國朝之間初亦曰永興治平中方改洞元今攷此記永興得名甚遠中間蓋移于洞元遂失舊物至大觀始復耶乃併書以遺道貴使為觀門故事且補蕙岷之遺意云乾道五年三月二十三日

### 跋趙德麟書



詞翰雖君子餘事必淵源有自乃可貴焉德麟既著錄于老坡之門子禮復順風于德麟之室而誠父又子禮過庭之佳子弟也文獻相承夫豈偶然推而上之傳道安可以無宗哉乾道己丑五月二十四日

跋米元章書秦少游詞

借眼前之景而含萬里不盡之情因古人之法而得三昧自在之力此詞此字所以傳世乾道己丑五月二十四日

跋黃丞相書

相國江夏公與大父同登元符進士第為一世相國猶

子遠觀得此帖而伯父轉運公跋其後又為一世今相國之孫仲實仲文復以示其蓋黃氏周氏周旋三世矣使吾二家子又生孫又生子世篤契好于文字之間不其休哉乾道己丑九月五日

跋吳說千字文

尚書即吳傳朋王逢原先生外孫也往見其論唐孫氏書譜自言總角以來徧參博考始悟筋脉相連之理蓋與近世不知而作者異矣皇諸孫從季家藏古帖甚富又求千字文于傳朋而刻之非樂善好事安能若此予于書惜甚而季兄子中筆法絕高常問道焉共評此字



雖未至顛張醉素之雄放而圓美流麗亦書家之韻勝者也乾道己丑九月

跋張魏公批劉和州事目 庚寅

魏忠獻公克己復禮之學愛人利物之心雖片言隻字亦可想見所謂造次必於是者年家子周某題

跋虞丞相尺牘

陳孟公口占私書數百封親踈各有意河南大驚韋郇公命侍史答牋記惟書名若五朵雲時人慕之翰墨之貴古今一也

跋胡邦衡辭工侍并御批降詔真本

乾道六年冬滹庵先生胡公正貳冬官具章陳免皇帝親批降詔不允臣某實視草焉明年先生求去甚力進敬文閣直學士奉祠還廬陵敬以宸翰歸之



議即致仕蓋廬陵名士也其孫忱

彥誠亦登第於元祐六年山谷丁安康憂時適為州掾  
以世相契善雖薄物細故舉屬之諸帖或字以誠父若  
元誠者哀悴中未免遺忘也刻文宰上諒不食言惜乎  
祥琴御而史獄興雖一莊未荒而三服莫就覽者將嘆  
息於斯焉乾道九年五月癸丑書以遺奉議公四世從  
孫篆凡二十七帖釐為三軸云

跋張文潛帖

右張文潛右史遺李彥忱誠十一帖右史以元符末貶監  
黃復二州酒稅祐陵初政乃起守東魯方黨禁未解時



同僚雖鄰不覩右史亦眼高無人也一竟陵令獨相親  
如此又得文人之稱彥忱識才行可槩見矣乾道九年天  
申節

跋東坡與趙夢得帖

南海上有義士曰趙夢得方蘇文忠公謫居時肯為致  
中州家問其賢可知公既大書姓字以為贈又題澄邁  
所居二亭曰清斯曰舜琴特畏禍不欲賦詩故錄陶杜  
篇什及舊作累數十紙以寓意然會茶帖云飲非其人  
茶有語閉門獨啜心有愧詩在其中矣僕生晚不獲從  
夢得訪公遺事而識其孫左奉議即荆寬厚夷雅力學

工詞章所至榜書室曰見坡其慕向豈特翰墨而已夢  
得真有後哉乾道九年六月十九日

題故饒州梓西溪居士蔣謨傳後猷之子

予幼從外家聞丹陽蔣公政和間為中執法有隼擊鳳  
鳴之稱今觀饒州府君復以十事憐：納忠乃知滅孫  
有後于魯管仲世祀于齊非無驗也淳熙元年二月十  
八日

建炎御筆跋

德壽皇帝中興初肆筆便入神品庭堅書法特筌蹄耳  
臣宋錢孫之子以遺臣段元愷而元愷以示臣某謹稽



首再拜題其後淳熙元年三月既望

跋曾無疑所藏米元章帖

元章初學羅讓書其後超邁入神殆非側勒弩趨策掠墜磔所能束縛也

又跋章友直畫蟲

近世文與可工行草篆隸飛白溢而為畫章伯益益同時人也後題無礙居士即米元章元章亦兼嗜書畫有好古之癖使此軸出晉唐間當在巧偷豪奪之數耶淳熙元年三月二十四日

題鄭忠愍公驤遺事

某頃為兒童聞伯父言虜破關中時得全節之士二人其一即同州鄭使君先天父同年進士也其一蓋陝西轉運副使桑景詢伯父嘗為之屬以是詳知本末始桑公行部望騎塹薄長安官吏駭散獨旋軫入城陷盛服向闕再拜訖與一女俱赴井死今鄭公賜謚立廟子孫祿仕相繼又得當時名人暴揚忠烈定可不朽惟桑公無子知者甚鮮因附其說于鄭公遺事之後毋亦使其無傳也淳熙元年四月四日

跋劉楚公沆拜相告

右彭城公拜相制書一通元孫石城尉德循寔寶藏之



按公以至和元年中秋日相前一夕仁宗召當直學士  
楊偉不至乃宣趙槩視草自此遂詔學士有故不宿者  
以次官遞宿然制詞與今實錄所載不同多為史官潤  
色惟不改雅性內融敏識先覺八字此殆後世公議非  
一時褒語也自至和距淳熙改元實百有二十年而歲  
次俱甲午云七月丙戌朔

跋朱新仲自誌墓

唐杜牧之以詞章名仕至中書舍人嘗典教郡將終自  
誌其墓逝世同鄉朱公一與之同但壽過牧之耳異哉  
淳熙己未二月六日舟過豫章公之子輔出示此軸敬

題其後

跋蔡敏肅公平戎慶捷詩卷

在其元孫  
西安丞家

熙寧中收復熙河洮岷疊宕等州裕陵歸功介甫親解  
玉帶以賜元厚之詩云何人更得通天帶謀合君心只  
晉公益謂是也蔡公又為西帥晚預籌帷幄斷章專及  
舜功殆有微意介甫和篇為推舊伐則公之勞亦不可  
掩矣淳熙乙未二月辛未

跋吳仁傑所藏張旭草書酒德頌

張顛蘇人吳君斗南寶與之同郡寶藏其書固宜然莫  
子齊云章申公家有酒德頌甚偉奇紹興間入御府茲



豈別本耶淳熙乙未八月旦

跋司馬溫公呂申公同除內翰告

神宗皇帝天縱將聖煥乎其有文章即位之三月首擢司馬文正呂正獻為翰林學士此當時贊書也惟二公道德文學冠映本朝故其進用大同者三在仁宗時力辭知制詔並改次對入侍經幄同乎初也右文初政並升翰苑同乎中也泰陵嗣服俱在揆路同乎終也追觀前世名公卿同時被遇者固多至于更歷累朝名位均一如二公則鮮矣今文正曾孫伋正獻曾孫企中適為司農長官相與論述先契感嘆不已于是摹繪言刻之

以某寫直鰲禁俾題其後昔唐文宗問魏文正公五世孫謩曰卿家書詔頗有存者乎謩對惟故笏在詔令上送今司馬氏保有此書過魏氏矣與國咸休永世無窮惟後之人實圖之淳熙二年九月一日

跋景文公唐史藁

香山詩語平易六一文體清駛疑若信手而成者間觀遺藁則竄定甚多景文之于唐史刪煩為簡變今以古用功既至尤宜不苟也如吳兢一傳具藁不知其幾此本似定矣然以新史校之亦復不同杜詩云更覺良工用心苦茲可嘗鼎也自不足累德而上頗有脫簡惜哉



淳熙丙午二月二十二日新安程叔達清江蕭燧上饒揚恂東里周某同觀于東宮直舍

歐陽修云涼竹簟之暑風曝茅簷之臘日頷瞻玉堂如在天上臣才駕志哀襟被候汰異時有此

臘歲終祭名也于文從月其後乃有從虫

臘歲終丁三則  
當在十七卷  
跋江權卿一  
則後

者玉篇以為蜜滓二義實亦相通學者每疑柳文中臘言厄貌字當從虫是殆因古今謂十二月為臘月遂疑其旁從日月之月耳偶讀此詩就為之辨淳熙八年三月五日

蘇長公黃岡冬至帖妙甚已漸變右軍書矣仲俞仁丈未詳其姓名既云鄉思浩然想同此味殆蜀之老成人也少公詩皆簽判南京所作長篇益憶在齊州與孔常



父游從耳二絕句乃和張厚之厚之樂全之子也淳熙  
八年三月五日

予閱王荆公帖多矣大抵始稍謹末必縱蓋平居好深  
湛之思孰肯致意于尺牘此又其暮年者尤宜坦率也  
淳熙八年三月五日

省齋文稿卷第十七

周益文忠公集十七

題跋四

光堯御筆賜陳正彙白金三百兩跋

諫官陳瓘夢奠於宣和墓木未拱而光堯眷禮正彙如  
此其不能恭承嘉惠者天也是年十月正由遂為考功  
又數年正同亦自省即驟掾公府竟至侍從興王賞諫  
臣善：及子孫古或有之然未有如我光堯眷：陳氏  
有加而無已者也後之人盍思紹先烈而報國哉淳熙  
三年四月三日

跋皇祐朝賢送張肅提刑詩卷



右皇祐庚寅冬朝賢送張肅赴江東提刑詩一卷由司馬溫公范蜀公而下凡十有四人溫公復追錄岳州送行一篇按仁宗實錄慶曆七年五月張公自廣東運判擢利路提刑會有指其前在任過市物者九月貶知岳陽至是乃得牽復今讀溫公新詩以松不彫寒絲曾斷直為褒舊詩有出群得罪鶴介雞憎之嘆是必以廉直反為同僚讒賊多端者巧中耳又一聯云飲水豈容吳刺史謗書翻似馬將軍前輩用事精確如此張公雖止祠曹郎中按刑閩服然蓄其餘澤敷遺後裔子孫祿仕奕世不絕紹興初曾孫延壽遂為侍御史天之報施昭

昭矣庚寅距今實百二十七年侍御之子宣教即適正來求跋語偶夜直玉堂敬附名於卷尾且以見太史氏因官文書紀事往：是非失實秉筆者當致審云淳熙丙申七月十九日

跋程宗正之子鑄墓銘

哭鯉傷烏聖賢有所不免今新安程公銘冢子之藏筆力得于天成慈愛出于天性使人讀之於十年之後猶太息不已黃太史云眼看白璧埋黃壤何況人間父子情予於程亦云淳熙丙申七月二十一日東里周某書時同試館職於玉堂



跋范元卿所藏醉翁帖

右南宮舍人范元卿所藏醉翁帖翁喜賢俊重交友出於天性其立朝尤相善者劉與蔡也觀此畧可見矣今居士前後集有手書數卷而寄原甫帖在焉所謂用快大過及餞聖從與景仁介甫清坐終日等語良是至于才薄任過有望于公以濟不逮及未歸間不惜時枉問之類大率意同辭異獨論簡事為外名迹幾百言而真蹟殊無之數日大風至照管公儀家則集本略不載夫尺牘出于信筆非若著書容有刪潤也縱後人傳寫差誤亦當不過十數字乃爾異同何耶謂二者非一時所

作則又事辭不應甚似如此元卿素以博洽聞願質疑焉淳熙三年八月二十七日

跋韓忠獻王帖

右韓忠獻王荅司馬文正公手書其前二幅蓋熙寧四年春文正自雍移許時也後二幅則歸洛矣二公在嘉祐中固已忠義相許及治平初忠獻畫陝西義勇之策文正四論其非畧無假借已而自劾至于三奏六申中書前輩周而不比和而不同大抵如此暨王介甫得政時異事變尺牘酬荅收：以為國為宗社為天下為禱大忠大義執鞭欣慕忠獻豈虛辭相悅哉使當時見之



可以動悟人主後世觀之可以庶貪立懦彼為無使齊  
年知無使上知之語者讀此穎其泚矣竇君即舜卿也  
淳熙三年十一月二十日奉勅同文正曾孫權吏部侍  
郎伋齋祠璿璣觀出示此帖敬題其後

題金華喻葆光書佛經卷

良能  
之父

王龜齡遇人談釋氏輒詆罵乃首為喻居士題經卷古  
人能起後人之敬必有道矣非專以其子為同年進士  
也淳熙四年三月十二日

跋宇文虛中書

宇文公忠謀義槩謂當享平國君之封而天不相之乃

從庾珉王儁于地下可為痛哭流涕淳熙丁酉三月戊  
午

同前

蘇屬國看羊海上假鴈足帛書而得歸宇文公真有此  
書而不得歸悲夫淳熙四年三月十八日

跋初寮先生帖

初寮先生未冠時及拜東坡于中山筆精墨妙宜有傳  
授當政宣間禁切蘇學一涉近似旋坐廢錮而先生以  
奪胎換骨之手揮毫禁林初無疑者靖康而後黨禁已  
解玉佩瓊琚之詞怒猊渴驥之書盛行於東南然後人



人知其為蘇門顏閔也晁張復生其鴈行先生與仲明尚公及其之大父俱為元符庚辰進士故尚公之孫中庸出示此帖敬題其後淳熙丁酉四月既望

跋鄒志完曾祖詩

詩語忠誠心畫莊厚天禧天聖間氣象大率如此可以尚論其世矣忠公作跋時正遭外艱所謂聰聽祖考之彝訓未葬讀喪禮既葬讀祭禮者耶淳熙丁酉四月己卯六世孫朝奉郎燧以示舊同僚東里周某敬題其後

跋閑樂居士陳師錫與了翁陳瓘論王氏日錄書

陳了翁以元符庚辰八月為司諫雖論裕史陵不當用日錄然多是王介甫而非蔡卞明年八月自都司出守海陵閑樂先生實遺以書其後了翁猶有合浦尊堯之作大觀四年始因星變復上四明尊堯集及尊堯餘言痛悔前作則此書為有助矣淳熙丁酉予判吏部南曹閑樂之孫昌年適來調官出示遺墨乃畧考歲月而歸之五月二十五日

跋淨慧寺東坡題名

佛日淨慧禪寺在桐扣黃鶴峰下寺中有池：有渥洼泉東坡先生嘗賦五絕句所謂細泉咽：走金沙者堂



上留題今既百年而詩僧慧舉乃謀入石可謂好事矣  
桐扣以張華得名俗云同口非也淳熙五年正月九日  
跋陳晞顏從古和簡齋陳去非詩

淳熙五年正月丁巳天寒甚獨直玉堂快讀同年晞顏  
和簡齋詩五百壹拾餘首已愧王摩詰不能致孟浩然  
之伴直當如裴均他日對草吉甫制耳

書簡修行狀後

從事郎清江簡公之卒也其鄉人胡開孺實為行狀今  
四十七年矣而從事之弟致政思邈公屬某以銘昔政  
和中先君隨侍大父官鄜州法當由鄜郡升貢簡公實

為坊州教授蓋嘗擊節先君之文今行狀備載其事可  
謂有先契矣銘何敢辭然聞開孺乃山谷先生同年彥  
明之子詩人藏之之弟承父兄師友淵源之正其辭日  
光玉潔雲蒸而川流也從事得此自宜不朽鄙辭尚安  
所措姑題卷末歸之簡氏淳熙五年二月十七日

跋趙善應行實

有閔睢之應然後公子有信厚之風有行葦之仁然後  
人有士君子之行周則然矣本朝奚愧焉觀子直著作  
叙其先人之遺事寧不槩見蓋古者子孫論撰先世之  
美明著之後世雖本于崇孝而終實重國家溯流求源



固非一日積也採詩者出尚有考于斯文淳熙五年六月晦

跋趙子崧詩集後

靖康之難近畿諸郡皆陷獨端明公以宗室祭酒堅守淮寧首尾半年迄收趙犂保境之功又能詆訶閏位糾合齊盟鄆邑築壇遂叅佐命不幸不為媚嫉者所容復使出鎮京口名曰因任所長實欲陷之死地未幾狂寇暴至無城可守無兵可禦猶與其下力戰重傷然後退保江岸上章待罪媚者計得坐敗龔州昔唐天寶之亂河朔盡陷獨顏魯公固守平原及至德改元不能當史

思明尹子奇之鋒乃棄郡渡河惟公始末大率類此魯公進官公則遠徙人謀不滅一至是耶頽德壽皇帝深察非辜尋復朝散大夫示將復用而公遽即世矣豈非命與淳熙戊戌秋公之孫師聰示公詩文及遺墨因為畧辨當時之事以告著作氏

跋向子諲家邵康節戒子孫文

康節先生心聲正大可以銘盤心畫道勁可以貫隼薊林公寶藏以示子孫厥有旨哉淳熙戊戌十月十二日觀於槁文堂

跋汪聖錫家藏東坡與林希論浙西賑濟三



帖

林子中與坡公素厚善後又為杭州交承故書問惓惓  
如此林雖尋為利誘折資草制詆公不遺餘力然猶愛  
此帖弗棄至其子孫始以遺玉山汪氏乃知惡直醜正  
顛倒是非者豈盡喪其良心哉稂莠害之耳淳熙五年  
十月十三日東里周某觀于槁文堂

跋徐鉉篆李衛公項王亭賦

常侍此書陽冰之後一人而已淳熙戊戌十月十三  
日

跋蘇舍人題臨蘭亭序詩

有若象夫子尚興闕里門虎賁狀蔡邕猶旁文舉  
樽昭陵自一閉真蹟不復存予今獲此本亦可比  
璵璠翰林學士承旨中書舍人蘇易簡于玉堂北  
軒題

蘇易簡題蘭亭軸詩以其官考之當在淳化二三年或  
四年中距今淳熙五年十月殆一百九十年翰林學士  
中奉大夫周某題于行在玉堂之東軒

跋黃魯直蜀中詩詞

王公權荔枝綠頌姚君玉  
安樂泉頌茶詞滿庭芳阮

郎  
歸

杜少陵劉夢得詩自夔州後頓異前作世皆言文人流



落不偶乃刻意著述而不知巫峽峻峰激流之勢有以助之也山谷自我徒默身行夔路故詞章翰墨日益起妙觀此三帖益可知矣淳熙五年十月十三日

跋王禹玉內外制草

中書舍人陳騫翰林學士周某同觀歧文恭公內外制草淳熙五年十月十三日

又跋王禹玉謝翰林學士承旨表本

翰苑多雜製故其體不一某以乾道庚寅歲初忝寓直凡詞頭之小者院吏輒以片紙錄舊作于前謂之屏風兒予笑曰此陶穀所謂一生依本畫葫蘆耶今觀王岐

公謝承旨表藁亦連別本殆屏風之類矣其詞謂繇西掖入北門行將二紀又云鼎聖曆之肇新頌藩麾之屢易則為張文定公安道無疑然閱博燕閑浮鰲宣精等語歧公表實用之文體大畧亦相類二公蓋同直者頌不嫌于同此前輩廣大規模也淳熙戊戌十月十四日又跋王禹玉立英宗為皇子詔草及當日請對

奏藁

歧公既於中書聚廳處受御札立皇子夫復何疑猶請對而後草詔可謂過乎思慮矣然卒不免于讒語賴英宗聖明延見藥珠進職端明且有盤龍金合之賜逢辰



則然智力何有哉不然先日之謹畏祇足以成後來之罪戾耳淳熙戊戌十月十五日

跋歐陽公與通判屯田等三帖 張幾仲待制家

其已刻六一先生帖數卷于家塾他日當摹此三帖附益之淳熙戊戌十一月二十五日

跋黃魯直與全父醉帖

僕以淳熙乙未春與幾仲同次對數文閣幾仲旋鎮襄漢三年而歸又獲接武內朝會江西謀帥幾仲復在選中千騎塞途旄旄赫奕僕往慶烏天盛寒飲沆瀣一盃徑醉幾仲出山谷醉筆輒題其後他日歸為部民當再

觀於滕王閣之上淳熙五年十一月二十五日

跋王介甫彌勒偈

王荆公書楷法如此者絕少端明胡公已茂所謂不敢以易心為之者是也又平生儉約未嘗輕用繡帛獨于佛語用之亦是意耶淳熙戊戌十一月二十五日

跋黃魯直晝寢呈李公擇等四詩

詩雜古律字兼行草此山谷得意之作也淳熙戊戌十一月二十五日

跋東坡帖

淳熙戊戌十一月二十五日東宮講讀因與同僚共觀



坡仙墨妙而戴子微太常亦出懶放一帖大槩絕相類  
惟拜字異耳真臨雖難辨要皆書法也

跋馮京與朱諤右丞家書

右馮文簡公與其孫婿朱忠靖公書前一幅元祐八年  
冬後一幅紹聖改元春也馮公時以太子少師致仕居  
京師而朱公為壽陽節度推官所謂蘇相蓋揚帥子容  
也馮公作此帖僅數月即夢奠于兩楹後六十六年朱  
公之孫叔召自蕪湖來求跋語按熙寧間馮公與王介  
甫同在政路能使介甫有所畏憚至為無使齊年知之  
語其正可知矣翰墨自應傳遠况家問乎惟其外祖少

師初佐壽幕朱公實來為代兩家契好不薄其後叔召  
遂為外祖孫婿云淳熙六年四月二十八日

跋秦少游帖

觀自去歲入京遭此追捕親老骨肉亦不敢留鄉里  
治生之具緣此蕩盡今雖得生還而仰事俯畜畜之計  
蕭然不給想公聞之不能無惻然也不知能為謀一  
主學處否試望留意幸甚惠及銀杏尤見厚意感悚  
忽遽未有以為獻者行甫聞授宣城是否家叔已赴  
濱洲渤海知縣祖父在彼幸安但地遠難得書耳李  
端叔從軍近日都不聞耗不知何如也與公別未幾



世間事多變如此既可嘆復可笑耳何時展晤以盡  
所懷觀再拜

少游作此帖猶未仕也今淮海集有對詔獄二詩所謂  
一室如懸磬人音盡不聞老兵隨卧起漂母給朝爨者  
殆去歲追捕時耶淳熙七年正月十四日東里周某同  
崔大雅觀於吏部直舍

跋彌明石鼎聯句圖

昌黎詩中有畫李伯時畫中有詩此雖臨本亦可見吳  
生遠擅場之意

跋山谷萍鄉縣寶積禪寺記

寶積禪寺本周廣順中以民李氏施地宅建梵林寺  
寺有僧伽像顯德中見光怪累日因改寶積寺星居  
六室以元符二年十二月勅破律為禪以僧紹絜主  
之而絜于萍鄉無法緣居十月而里人不施一錢于  
是棄而去三年十月余伯氏元明為令也擇請延慶  
院山主宗禪來尸法席禪倦游諸方號稱得安樂法  
其居延慶院也變飲酒食肉處為菩提坊開草萊荆  
棘叢為金碧聚故元明以為是必能興我寶積三招  
而後肯來至則破六律院為一叢林謗者杜口擅者  
傾施不閱歲盡徹蜂房之屋鬱為鷲峰之會建中靖



國之元方丈三間世尊之廟崇成矣越明年樂淨堂  
德味厨法堂皆畢工凡率有家之錢為五百萬而所  
以庇覆安樂道眾冗徒之屋無不具使囂訟者口談  
般若鄙吝者心悅檀施若禪者可謂有功于此縣而  
其道行之化或溢于鄰邦矣伯氏來屬為禪記之故  
叙載如此崇寧二年十一月丁丑朝奉郎管勾洪州  
玉隆觀雲騎尉賜緋魚袋黃庭堅魯直記并書萍鄉  
縣令黃大臨元明立石

壬午歲涪翁航荆江畧洞庭涉修水徑七十二渡出萬  
載宜春省元明于萍鄉為留半月明年在武昌始作此  
記未閱月而承天院記之禩作遂長流宜州計未暇刻  
石也故集本闕焉他日當同承天塔記附錄以成束皙  
補亡之義淳熙七年正月十四日

跋東坡草烏頭方帖

仇仙慕葛稚川陶隱居孫思邈之為人欲以救人得道  
故常留意名方此其一也淳熙庚子正月十四日  
跋山谷書東坡聖散子傳

山谷作龐安常傷寒論後序云前序海上道人諾為之  
故虛右以待道人指東坡也今又書聖散子傳若安常  
所謂得二公而名彰者耶淳熙庚子正月十四日



跋陳簡齋法帖奏藁

德壽皇帝嘗論近世絳帖已少錢希白所臨潭帖為勝臨江帖失真遠矣又淳化帖大觀帖當時以晉唐善本及江南所收帖擇善者刻之丰骨意象皆存今觀故參知政事陳公與義為侍從時奉詔定法帖十卷釋文一冊其間稍辨劉次莊之誤殆臨江或潭帖與陳公字畫清簡類其詩文紹興初步中朝故特承善誨知人則哲茲可觀其緒餘淳熙七年正月十四日試吏部尚書兼翰林學士承旨周某為起居舍人未待問題

跋鄧延所藏其祖溫伯與東坡倡和武昌長

篇

蘇鄧兩公同直禁話舊賦詩逮今踰八十載東里周某始獲敬觀鄧氏別本予行在所因命院吏印其後印蓋景德二年舊物兩公嘗佩之矣升堂伏几而襲其裳得毋象環之患與淳熙庚子正月二十八日

跋趙忠簡公答魏侍郎砭手書

故吏部侍郎魏公邦達天資鯁挺忠憤自信方趙忠簡公再遷海島萬里通問情誼彌篤觀此答書槩可見矣忠簡既薨歸窆衢之常山縣郡守知中外士大夫平時多書疏往來至是必爭持酒漿會葬意可為奇貨以媚



時宰密諭邑尉翁蒙之以搜私釀為名馳往掩取蒙之  
許諾守猶疑漏言潛戒左右伺察之蒙之畧入解書片  
紙自後出迎趙氏子告之故趣盡焚篋中書及屏棄弓  
刀之屬比蒙之挾吏卒至一無所得守大怒劾于朝時  
宰疑其已甚徙蒙之尉蘭溪使避守是時士氣未泯言  
問遷客議論時事決非一族微蒙之以身扞蔽則根株  
牽連當起大獄魏公且為罪首非仁乎蒙之初被委苟  
能避免便足取名然惧小人代尸其任則于善類奚益  
故說詞以承之陰謀以洩之忠簡之家賴以紓禍非智  
乎凡小吏忤二千石罪或不測况相國深怨宿怒決壞

不得逞昂鑊在前直趨弗顧非勇乎一物而三善從可  
書也已蒙之字子功富沙人彥國之族也長不滿五尺  
語不能出口見義必為不擇難易輕財樂施嘗粥田宅  
濟人之急交友付託之死弗肯為一尉已能如此向令  
踐貴位仕臨大節其所立必卓然不可及上初即位大臣  
誦言其事詔特改京官除寺監簿出佐帥幕再入為寺  
監丞年五十卒予惧其無聞故因是書表而出之庶幾  
附趙魏二公而名彰云淳熙庚子三月二十一日書

跋唐相國梁國公忠為吏部侍郎加勳告

右唐相梁國忠公為吏部侍郎日加勳告一通子孫世



寶藏之至紹興吏部侍郎邦達蓋二十三世矣由神龍  
 己巳距今淳熙七年庚子已四百七十六年而印色如  
 新蓋古者百工之物皆良故能耐久如此按舊唐史中  
 宗以正月二十五日丙午即位于通天宮此告云二十  
 七日制者後兩日方覃赦也然所載推恩頗畧當以告  
 為正史又云二月甲子立妃韋為皇后內外官陪位者  
 賜勳一轉則與制合甲子乃十四日告稱十五日制者  
 後一日也

跋趙需張致遠魏缸奏劄

右紹興四年十二月臺雜魏公邦達副端張公子猷拾

遺趙公：時同論和議疏一通其藁者魏公也欲上而  
 改貳秘書張公實代之後四十七年魏公之子欽承以  
 示東里周某敬題其後淳熙庚子三月十三日

跋先大父秦國公所作涪州使君李昌年墓誌

銘

右涪州使君李公墓誌銘先大父宮傳所作先人少師  
 實書丹按李氏之先以勲業事太祖皇帝自是世有顯  
 人誌其墓者又皆一時名卿凡園亭在汴都則有翰林  
 王公元之：記丞相李文正公而下諸賢歌詩在洛中  
 則韓忠獻王富文忠公司馬文正公而下皆賦焉今涪



前卷後附臘歲終  
祭名次于此

州曾孫袞之以予家三世通姻好萬里相訪且出其家  
石刻甚備獨涪州銘文不在乃錄本以遺袞之且以補  
史之闕文云淳熙八年辛丑歲謹記

跋江權卿所藏諸家帖

國朝兩制極天下之選文章名世者率居此官蘇門四  
子周旋館殿垂上詞掖乃復流落士大夫至今以為恨  
觀此數帖大畧可見晁雖幸群正彙升然事亦隨變黃  
九卒不及聯事天官云淳熙八年三月五日

跋陳與義費肅張擴被召省劄

三英之召或云富季申為中丞日所薦館閣才也嘉祐

以前兩府初除各舉館職三兩人即時召試其後乃上  
簿候闕治平中歐陽文忠公益嘗論此官制既行盡歸  
秘書省至元祐初復置館職許大臣各舉所知三人未  
幾又罷太上皇帝當國步多艱之際兼採累朝故事涵  
養異材富公方執法已能薦士如二府大用之意固自  
可見已而遂升右府云淳熙辛丑中秋日題

跋陳從古梅詩

淳熙辛丑冬淮浙告饑欲詳知郡縣荒政次第聞于上  
退食接客或至日暮官舍後有梅一株不暇問訊何如  
也同年陳兄晞顏和古今梅詩千篇聯為二十大軸遠



以相示秉燭快讀雖未容含英咀華固可望之止渴矣  
 夫以晞顏之學之才筆端袞：宜有餘地然吟咏一草  
 木安能闕麗與衍千變萬化不窮如此及讀最後兩卷  
 乃知自其曾大父先大夫世以詩鳴皆眷：于此花源  
 遠矣哉漢崔篆生毅：生駟：生子玉然後文名著唐  
 杜審言生閑：生甫然後詩名顯彼日鍛月鍊雕肝琢  
 腎工可能也多文以為富則非世業殆難能也十二月  
 二十日

跋伯父與鄭庶手書

初叔父靜江府君為衢州安仁令某年七八歲因

行而識武尉鄭幾仲其後伯父再守辰陽幾仲實為  
 僚吏某時年二十餘矣由初迄今已五十載幾仲之子  
 承信即謨自長沙來出示伯父尺牘八幅前六幅乃某  
 代作後兩幅手澤也死生契濶少壯衰老蓋有不勝嘆  
 者淳熙九年三月九日

跋蘇石帖

歐陽文忠公好賢樂善克其天性得交友間寸藁尺書  
 必軸而藏之况曼卿子美俊才直節公深知之雄詞健  
 筆公素推之而位皆不過館職年皆不登知命此公之  
 所尤悲也故于遺墨特致意焉熙寧壬子公夢奠之歲



也猶親跋于卷尾去之百一十載會稽王佐以大司空  
行內史事得此本于公元孫歙尉似欣慕前哲並刻之  
石惟公道德文章師表百世而千旒緇衣之好之死靡  
俟彼爭名者相傾屬文者相輕聞公之風其少以故淳  
熙壬寅八月辛丑

跋與徐林書

紹興末龍圖閣直學士徐公稚山以舊德再還從班宅  
在銀鎗寨中予以左吏兼行詞掖居暗門城下相去百  
餘步而東偏書室適隔一墻公忘年下交屢欲開便門  
相過從予曰壁壘已定穿窬不由路如禮義何公笑而

止公既没予挽之云昔者陪簪筆比隣銳鑿垣蓋謂是  
也後二十年壬寅冬公之孫武康尉雲紀錄于中間答  
公書以相視覽之悵然

題蘇子美草書蔡君謨大書跋帖

蘇草蔡真可稱二絕淳熙癸卯中春告朔周某敬觀

題唐人硬黃臨王獻之帖

臨本猶可愛如此况於真蹟伯時寶之伯長仲晦書之  
不可不題其後淳熙癸卯二月朔

題米芾馬賦

元章詞筆俊拔略無滯礙使能約以法度博以問學則



生當獨步翰墨之場沒且登名文章之錄其成就豈止此而已惜夫淳熙十年二月一日

題蘇子美寶奎殿頌帖

仁宗朝摹太宗御書大相國寺額于石即寺為殿而藏之御飛白名曰寶奎殿舜欽此頌當是召試館職時所作年方三十餘也其云上宰宗工更為詞章者謂呂夷簡作記章得象題額之類與淳熙十年二月五日周某書而歸之玉山汪氏

題蔡君謨書柳子厚吐谷渾詞

蔡忠惠書洛陽橋記與吐谷渾詞皆大書之冠冕也淳

熙癸卯月日

跋趙湖州祠堂記

右湖州刺史趙公子嶙祠堂記仲并所作其載守城之功甚備獨云事甫定公遽罷後以御史言復還又數月竟去凡稱罷者再漫不言坐何事予惧或者疑公為罪行故以聞諸太史氏其補之蓋己酉冬宣撫使出于無策謬用武臣楊應誠代公守湖父老遮道閉關不能留至明年五月上用臺評黜揚而還公：感上之知念民之困也益思撫摩以為報會轉運使督緡錢十萬餉劉光世軍而堂帖隨下謂州故貸椿管錢二萬緡米七千



斛期以旬盡償公言民力不支請先軍需後償欠朝廷遂劾公侮慢貶秩而罷其始末乃如此是豈以一時守城為功可謂能固邦本矣湖人奉嘗至今有以也夫公子伯衍屢求予書將刻之碑陰云淳熙十年九月十日

跋文潞公帖

熙寧大臣獎用新進指安靜為委靡故于邊防河事措畫紛然潞公在北都作歲頌四篇以諷而二頌尤深切著明殆諫書也時公年過七十筆力猶清壯如此非獨見其所養深厚亦足占壽考之祥矣是後安享富貴又

二十載其年德名位可以伯仲衛武而中書之考幾于倍蓰郭令嗚呼盛哉此帖藏叅知政事北陵張公家張公之孫大理寺丞抑以示東里周某敬題卷末淳熙十年十一月二十三日

跋汪季路所藏山谷與柳仲遠帖

仲遠二蘇公堂妹婿柳君也故山谷此帖多及東坡穎濱其後坡祭妹文云玉立二甥一秀不實豈非所謂十三者耶淳熙十年閏十一月二十五日

跋汪季路所藏朱希真帖

朱希真避亂南渡流落嶺海江浙間德壽皇帝因明索



薦特召而用之既掛冠矣秦丞相擢其子為勅局刪定  
官希真間來就養是時東閣郎君慕其詩名欲從之游  
為修廢官留為鴻臚少卿希真愛子而畏禍不能引去  
未幾秦薨例遭論罷出處固有可議然亦可憫也今觀  
其字如其詩其詩如其人後世不待識面當知為伊洛  
勝流矣

跋張魏公與連壅帖

富貴不足道孝悌忠信可以垂名百世利澤萬物紹  
興辛酉重陽前一日書贈連君幾宜紫岩張德遠  
應山連處士一布衣爾既沒而鄉人法其孝友禮遜凡

矜寡饑饉之人皆追思之歐陽文忠公表其墓謂行之  
以躬不言而信蓋實錄也有子四人而寶文公則第三  
子之孫以文章贊書命才畧典方面克孝而忠大其家  
聲今幾宜君復蒙上拔擢守蓬守邵進用未已施于有  
政豈直如處士居鄉而已乎舉斯心加諸彼則上不負  
天子下不負張忠獻公之言矣淳熙癸卯臘月丙寅

跋錢穆公與張文潛書

右錢穆公與張文潛書蓋元祐末紹聖初文潛自潤改  
宣及謫黃州監當時也文潛妹歸穆父第二子東美婚  
姻之故情誼款密其賀入翰苑啟猶載文潛集中所謂



內翰侍讀四丈者未幾竄逐元祐臣僚人以東坡兄弟  
秦少游為諱而穆父憐問懇惻且有靈光巋然之語蓋  
自况也最後勉文潛以卯入申出仍以閑詩文不着急  
為諷意愛深矣淳熙癸卯閏月十三日偶觀此帖而刑  
部侍郎曾躬適相遇知其為錢出也問以得姓名同  
兒謂誰仲躬曰即吾母魯國太夫人今年九十飲食視  
聽不少減予嘆曰賢者之孫固宜壽而康耶仲躬又為  
予言外祖拔解後侍翰林使高麗既歸省試已終場不  
能無悵然會開寶貢院大火至焚死考官有旨再試遂  
在選中外祖喜甚翰林責之曰爾不念被焚者耶因併

記其語而歸之汪氏

省齋文稿卷第十七 終



省齋文稿卷第十八

周益文忠公集十八

題跋

跋汪季路所藏張文潛與彥素帖

朱希真父諱勃元祐紹聖之交為右司諫時張文潛為起居舍人故云同省今國史院有李仁父編國朝百官公卿表而諫官門逸朱勃姓名以是知闕文多矣淳熙甲辰正月二十五日

跋汪季路所藏東坡作王中父哀詞

其後注云謝鯤事更

煩檢晉書恐誤用

某幼於武臣張可久家見東坡序六一居士集起草至



作於其心害於其政發於其政害於其事四句每句上  
下兩字用筆與全篇濃淡不同似初闕而後填益益  
予又云生於其心害於其事發於其事害於其政一書  
而文意交錯疑混故當審而用之耳前輩言坡自帥杭  
後為文用事先令門人檢閱今觀東藁帖則已加詳矣  
况暮年乎况他人乎

跋朝士送王校書通歸台州詩卷

校書君位不能滿其才此詩軸即柳儀曹先友記也淳  
熙甲辰二月中林

跋范文正公五帖

右范文正公五帖四世孫之彙所藏也其前家書四通  
皆遺兄仲溫者以文正集考之嘗歷寧海軍節度推官  
遷太子中舍致仕後一帖字仲儀即王懿敏公也范氏  
自忠宣公擢第皇祐之初至乾道八年而之彙乃復登  
科中間寥々益百二十有四載矣世濟其美尚知勉哉  
淳熙十二年二月六日

跋喻子材樗帖

喻公子材邃于經學敏於詞藝紹興初館閣多俊傑視  
題名可考也乾道壬辰予自小宗伯奉祠過無錫子材  
老矣用兩夫肩輿迂勞於途議論纒々使人聽之忘倦



其謂自天子至庶人皆有朋友三代而上每措之父子  
兄弟之間後世此道殊廢予至今紳書之汪季路其外  
孫也出示公遺墨因題其後

跋劉器之帖

淳熙七年夏連州守臣頓首上尚書謹按國史諫大夫  
劉安世秉誼据正國之寶臣不幸官未應謚其曾孫孝  
騫嘗貢本州累授鄒浩蘇軾特謚故事以為請守臣不  
敢聞頓首上尚書六月丁酉制曰下禮部禮部下太常  
太常博士宋之瑞議以慮國忘家曰忠德行不爽曰定  
易安世之名九月甲戌復上尚書丞相臣雄參知政事

臣良臣：某奏臨安行宮制曰可明年考功郎章森覆  
謚議同十二月戊申始詔有司告其第於是天子旌嘉  
遺直之德意忠定公死而不朽之令名暴白於天下孝  
騫念祖之志伸矣他日出公二手帖泣而言曰曾祖在  
竄斥中母亡子天患難極矣而應之猶能踰嶺迎奠今  
正論既伸褒錫美謚而先父往歲賤死於連未克歸葬  
乃無哀王孫者某聞而憐之為孝騫言孔君嚴節度嶺  
海人士落南不能歸與流徙之胄百餘族咸受其賜今  
廣帥采若轉運會叔提舉廷玉暨連守昌君皆尚友古  
人樂善無厭第持二帖造焉必將念元祐之故家賡唐



賢之惠政孝騫其何慮十一年八月十日

跋尤延之家藏蘇子美四時歌真蹟

同時則妬賢嫉能異世乃哀窮悼屈古今殆一律也使  
劉元瑜輩見子美詞翰於百年之後則所謂一網之舉  
安知不轉為什襲之藏乎淳熙甲辰十二月三日

跋喻仲遷所藏蘇黃門翰林詔草

答韓儀公辭  
免同知密院

詔

國朝內制非一種吏具檢往：列舊作於前今猶如此  
私號屏風見其頃跋汪氏所藏王岐公謝承旨學士表  
併及陶翰林依本蒟蘆之語正謂是也按元豐雜壓同

知密院雖在丞轄之下然二府迭居固不計此韓儀公  
實自左丞除授豈應取序進加等之人文以為式吏輩刻  
舟記劍當發蘇公之一笑淳熙甲辰十二月中澣

跋蘇氏藏太宗御筆及謝表

臣嘗觀參知政事易簡之子者續翰林志載其父既具  
狀謝宸翰之賜仍面奏辭字從舌乃是正文并檢虞世  
南書者辭字進呈太宗皇帝大悅曰非卿博識朕以為  
誤矣蘇氏寶藏此軸垂二百年而臣始得寓目謹錄其  
事附卷末使來者有考焉淳熙甲辰十二月二十二日

跋嚴汝翼所藏張丞相詩



詩律清遠有樂道憂世之心筆法妍楷無震矜怠惰之  
容觀此則忠獻公氣象畧可想矣嚴君既親薰而炙之  
宜為佳士今改秩宰茶陵足行所學尚其勉旃某亦公  
年家子也故敢附名卷末淳熙乙巳二月上澣

跋東坡代張文定公上書

東坡代張文定公上書蓋熙寧十年也其後為公墓碑  
明載老臣死見先帝有以藉口之語然則書雖成於坡  
手而意旨必出於公不然何其危言至是耶神廟時可  
謂邦有道矣此彙比集本減數句改數字當以集為正  
真蹟今藏會稽薛氏而同郡石氏安摹刻之淳熙十二

年二月清明節

跋蔣穎叔樞府日記

蔣魏公元符三年春自西帥再入翰林四月擢貳西樞  
明年改元靖國七月升知院事又明年改崇寧十月以  
觀文知杭州在政府二年有半此其日記也延之所謂  
庾詞者如以祐陵為乘輿之乘蓋協律令第十卷兩指  
曾子宣為淮西豈非以為其謫亳祠耶然九域志亳隸  
淮東不應言西也淳熙十二年九月晦

題陳去非帖

紹興乙亥歲某初仕王畿陳公之子本之為郎為監家



藏手澤甚富每休務輒求觀竟日今踰三十年本之  
子仁和宰復示此軸前輩翰墨愈久則愈可敬而本之  
墓木已拱又可嘆也淳熙丙午二月十三日

題陳去非謝御書等帖

光武中興誅戰不遑啟處然猶投戈講藝息馬論道樊  
準在漢以為美談恭惟光堯皇帝撥亂於紹興之初維  
時陳公周旋兩制遂踐政地觀此奏藁知君臣講藝猶  
光武也論道細旃之上恨不得而聞之淳熙十三年三  
月十一日

題彭仲衡家東坡書黃庭內景經石刻

集古錄有黃庭經二篇不著書人姓名其字亦止於不  
俗一為六一先生所取而殿中丞裴造好古君子之名  
遂得附見今武岡主簿彭銓仲衡收黃庭內景石刻蓋  
東坡書也重以穎濱山谷之詩李龍眠之畫視集古所  
錄自當過之所謂好古君子固應無歎於裴獨鄙言不  
足行遠為可愧耳淳熙丙午四月二十日

題劉丞相沆拜相制

一紀之間三題此告歲月逾邁而功業無聞愧歎久之  
淳熙十三年五月十七日

題劉丞相沆追封克國公制



右元豐三年劉丞相追封克國公制典重簡蔚字畫綾  
紙皆渾厚亦可想當時氣象矣初至和中公與文富並  
相王文安為叅貳嘗同議立儲逮元豐褒典之行文富  
皆在獨公已薨魏泰東軒筆錄所記歲月位序存止皆  
差謬小說固難信也淳熙丙午五月十七日

題富鄭公與劉丞相沆書

廬陵劉公至和二年實在相位富文忠書蓋是歲正月  
者方以觀文守河陽二月即拜宣徽使判閏六月遂與  
劉公並位當時謂公素厚文忠力破朋黨之說致仁祖  
信任不疑合觀書辭信而有徵偶非親筆但書名耳淳

熙丙午五月十八日

跋臨江軍廖即婦碑

臨江廖節婦以死衛姑不辱於賊郡人戶知之二千石  
屢以狀上尚書輒復報聞其子士元懇請不已迄未獲  
旌嘉之命蓋國家凡肆大青必曰義夫節婦孝子順孫  
長吏常切存恤事狀顯著具名以聞又曰忠臣孝子墳  
墓所在州縣量加封護曾被旌表依式重立由前之說  
專主生存故死節如廖有所不及由後之說雖主於死  
然止云忠臣孝子故節婦復在所遺此有司具赦條時  
以例相承未之思耳他日能詳著之則廖必預褒典而



士元之志庶其伸乎淳熙丙午五月辛巳

跋鄭景望詩卷

言道學者薄詞章近世則然景望龍圖通經篤行見謂  
儒宗而其詩句乃綽有晉唐名勝之遺風胸中所養亦  
可知矣自其云亡不特永嘉學者深惜之中外士大夫  
皆惜之而予以舊交嘗僚尤惜之淳熙十三年十月十  
日

題宋景文公家書

前輩謂文章當如作家書今觀景文公家書皆成文章  
是固一理也淳熙丁未二月二十三日

題宋元憲公表藁

元憲公表藁辭理精粹真行燦然今蓋百五十餘年矣  
明窓三復如見其人淳熙十四年二月二十三日

題洪景盧所藏王摩詰山水

自崇寧興畫學名筆間出有賜紫待詔高克明者頗得  
摩詰用筆意當時甚重之今已不易致况唐朝真蹟乎  
淳熙丁未八月八日過史院翰林洪公景盧出示此軸  
輒記其後

跋韓子蒼詩送劉童子歸廬陵

劉童子七歲能誦書部使者聞諸朝既至京師會更



制不果試其歸也以二小詩送之

七歲瀾翻數萬言饑鷹引子望騰騫時平不用甘羅  
輩寂寞提書歸故園

不作西京童子郎時人已自識黃薌還家更誦五千  
卷十八重來詣太常

廬陵劉童子眉宇秀發音吐琅然試六經語孟左氏傳  
於大學覆試於中書其誦如流此外猶記他文教萬言  
緣更制不復盡試總免文解而歸乃父求詩送行屬光  
堯喪言不能文姑錄韓子蒼二絕句以示之尚有味于  
卒章淳熙丁未十二月旦某書

題向薌林家所藏山谷書南華玉篇

黃庭外景一篇世傳魏晉時道家者流所作自王逸少  
以來高人勝士皆喜書之此三十六篇乃其義疏名曰  
內景蓋養生之樞要也薌林居士藏山谷先生所書有  
年數矣其孫士虎遠以相示筆勢秀傑何待稱贊惟所  
用字較光堯皇帝賜寧壽觀本差殊頗多如首句虛皇  
尊今作虛皇前末句此其文今作此真文皆當以御書  
本為正淳熙十五年二月旦日

題汪達季路所藏墨蹟三軸

右東坡祭范蜀公文藁所獲皆賢後作所得燦如長庚



後作燦烏誰復舉之後作似之蓋種自應獲既喻求賢孰若得字之廣大也前已用今如辰星不必又云燦如長庚改用燦烏則語健而意足以舉為似太率類此學者因前輩著述而觀其所改定思過半矣淳熙戊申三月壬寅東里周某敬觀於太廟之齋廬

李西臺吾家膳部石曼卿鍾離景伯皆中原以書名者朱希真尹彥明又皆南渡名勝季路藏此帖可謂好事矣

題蘇季真家所藏東坡墨蹟

陸宣公為忠州別駕避謗不著書又以地多瘴癘抄集

驗方五十卷寓愛人利物之心文忠蘇公手書藥法亦在瓊州別駕時其用意一也淳熙戊申三月十七日

元祐六年夏坡公既作聰聞復字序後三年在武定復和其見寄詩有前生同社之語又後七年當靖國辛巳蓋公夢奠歲也猶贈詩僧道通詩云雄豪而妙苦而腴祇有琴聰與蜜殊其愛之重之如此淳熙戊申三月與洪景廬同以永思陵使事留秦寧寺獲觀

文忠公在翰林兩因答臣僚辭免有所論奏其乞許安燾辭轉官見內制集當時真蹟未知存否茲其一也蘇氏宜世寶之淳熙戊申四月六日東里周某書而歸之



公元孫朴

題王樂道帖

右王文恪公與許州屬吏帖五世孫佐之出以相示且曰秘閣有公文集三十卷惟奏議散佚不存予告之云公事仁宗為臺諫事神廟為中丞其論奏甚多國史本傳已載大畧當是時雖名臣比肩於朝然是非元不相掩如劾陳升之則及史昭錫之兄言郭逵則云文彥博之走吏范仲淹之弄兒又謂韓魏公久專國政君弱臣強乞行罷退一夕疏吳長文之罪至數千言皆見於司馬溫公治平齋記欲不焚稿得乎佐之因請題其後淳

熙十五年四月八日

題范太史家所藏帖

儒者病乎寡要實錄牽於多愛自太史公已然况餘人乎眉山李仁甫謂近則事詳遠則事畧不當以繁省論文其言美矣故續通鑑長編多採近世士大夫所著如曾子宣日記之偏王定國甲申錄之妄咸有取焉若得如范公者相與商度而斧蒸之又善之善也淳熙戊申十月十八日

右嘉祐六年春知舉翰林王公范公中丞王公貢闈唱酬一卷幅紙聯書則物無費隨手塗改則情甚真至於



宮商相宣金石諧和覽者自可玩味於詞翰之表太史公有云假令晏子而存余雖為之執鞭所忻慕焉近時張浮休題諸公與尹師魯帖乃謂假使皆無恙安得比肩踵門而過我夫賢者可從而不可致太史公之言蓋竊有取而未敢以芸叟為然也

跋向氏邵康節手寫陶靖節詩

康節先生蘊先天經世之學頌獨手抄靖節詩集是豈專取詞章哉蓋慕其知道也宣和末臨漢魯絃謂崔公讀山海經詩刑天無千歲當作刑天舜千戚某初喜其援證甚明已而再味前篇專詠夸父事則次篇亦當專

咏精衛不應旁及他獸今觀康節只從舊本則絃言似未可憑矣開歲倏五十或作五日近歲祁寬謂五十則與辛丑不合今康節真作五日尚何疑焉淳熙己酉重明節舟次臨江薊林向公之孫士虎出示此軸因表而出之

跋臨江守潘燾所收蔡君謨寫韓文三箴

蔡忠惠公書為本朝第一蘇文忠公言之矣誰敢改評至於因筆之正而知公心之正不在此三箴乎淳熙己酉重明節

跋彭惟孝求志堂記



夫子之門升堂入室者衆矣隱居求志猶云未見其人  
蓋非伯夷叔齊莫能當也太和彭氏築堂而是之名以  
似以續今三世矣至於孝求無念爾祖聿修厥德復形  
于名字之間則其求之也其諸異乎人之求之與淳熙  
己酉十二月十三日

跋呂居仁帖

紫薇舍人呂十一丈在政和初春秋鼎盛且方崇尚王  
氏學以蘇黃為異端而手書立身為學作文之法乃如  
此其師友淵源固有所自而特立獨行之操誰能及之  
近世謂以詩名家是殆見其善者機耶嗣孫祖平力紹  
家學遠示此軸歎仰之餘輒附名於後克之老人姓唐  
諱廣仁丞國諱枋蓋真宗朝叅政安仁之後仲長之子  
也紹熙元年正月二十五日

跋臨江軍任詔盤園高風堂記

清江：西一支郡耳而士大夫未至者必問向氏薌林  
如何任氏盤園如何其至則未有不朝薌林而夕盤園  
也夫園林勝槩所在不乏何獨二氏擅名如此非以其  
人之可貴與惟向公伯共早從前輩游旋受知高廟周  
旋中外事業顯著薌林迄宅又形宸翰盛年掛冠而歸  
迄備洪範之五福其可貴固宜任侯子嚴出於名家身



少年已負雋聲下筆輒數百言涖官所至辦治蓋嘗親  
炙向公不但慕藺相如於後世也惟其才高志大不肯  
少下人以是屢起屢仆在官之日少閒居之日多歛藏  
智畧盡力斯園殆與薊林為鴻雁行數上書致其任予  
頃在榻前明言其才願勿聽所請仍畀祠祿待他日之  
用天子然之而侯必欲希蹤向公懇請弗已後二年竟  
伸其志是可貴也郡人南安太守章君茂獻嘗作高風  
堂記誦侯之美識者躋之予自念知侯久而疇音薦進  
不力是一可愧叨塵過分未能如侯之納祿是二可愧  
四十年間往來不可計而才蕪思涸曾無一語形容園

中之勝發揚主人之善是三可愧因茂獻之記姑自誌  
其過云紹興改元二月

跋李次山雪溪漁社圖

唐元結字次山嘗家樊上與眾漁者為隣帶笠箬而歌  
歎乃自號聱叟今河陽李君名元字次山卜築雪溪又  
號漁社其善學柳下惠者耶始乾道間予官中都君以  
先世之契數携此圖求跋自念身遊東華塵土中欲為  
西塞溪山下語難矣屬者奉祠歸廬陵所居在城東隅  
去江無五十步洲名白鷺橫陳其前日以扁舟黃緣葦  
間鷗來相從百住往而不止雖未敢竊比張志和亦庶幾乎



元次山矣而君方以尚書郎奉使全蜀凡六十一郡之  
官吏數十萬之將士莫不歛板受約束衛枚聽號令猶  
念舊社不置萬里遺書與圖偕來督踐前約予欲遽數  
忘機之樂則君權任如此願豈招隱時耶須君他日奏  
記甘泉殿直承明尚寄聲於我當有以告君今未可也  
姑題卷軸歸之紹熙元年三月三日適逢丁巳青原野  
夫周某

題周噩兄弟間立本樂治圖

圖畫見聞心叙古名筆最後有唐陸滉堯民鼓腹圖殆  
此類與紹熙改元五月晦周某觀

又題款塞圖

周武王時四夷咸賓史官集其事為王會圖至唐貞觀  
三年東蠻入朝顏師古亦請繪蠻夷之在邨者以彰懷  
遠之德太宗令閻立德為之此豈唐人遺筆乎何意象  
之古也

題養正堂記并魯侯帖

右冀州養正堂記并與魯侯帖山谷為北京教授時所  
作年方三十有五自云比平時書札似差老勁明年調  
太和宰秋歸江南真積力久詞翰又非前比所謂九萬  
里風斯在下矣紹熙元年五月晦周某觀於宗人虞卿



兄弟家

跋倪求己所作鄒時飛行狀

鄒彥明之死其子時飛得內相洪景廬為之銘時飛死其子奎求鄉人倪丞狀其行實又將謁銘於他邦予告之曰漢許劭兄弟俱有高名好共覈論鄉黨人物每月輒更品題故汝南俗有月旦評夫人之善惡惟鄉評不可掩爾家再世為廬溪誠齋諸儒先所與未嘗改評則其是非可考矣矧倪丞甚文而賢乃父必賴以傳奚必他求哉奎曰然請歸而刻諸阡紹熙元年

跋王民瞻揚廷秀與安福彭雄飛詩

廬溪王公主廬陵文盟者六十年繼之者今誠齋揚監廷秀也觀二公品題彭君如此則其學問文采可知矣袖書過我欲默不可請為祝辭附名于左惟廬溪年近期頤而筆不衰予祝雲翔他日與之齊誠齋仕都顯美而進未止予祝雲翔他日踵其趾豈特毋負二公之言庶幾鄉里斯文之得其傳乎紹熙改元

跋永和歐陽樗叟銘

歐陽樗叟一鄉之善士始予登第叟不以儒先臨我贈我以詩今四十年叟之墓木已拱而其子若孫復與予遊皆謹厚好學不忘秋蘭朝菌之家訓叟為不亡矣讀



胡忠公簡所述銘文不勝懷人念舊之嘆紹熙改元八月十三日

記己酉杭州鄭樞密事

己酉四月七日新除端明殿學士同簽書樞密院事鄭毅劄子奏臣自陛下退處別宮日夕憂憤計無所出謂必藉外兵方可圖復兼義不當居職欲得以罪去即北走平江金陵見張浚呂頤浩舉義事累章待罪蒙太后降詔不允莫遂所請十四日忽蒙聖旨除臣御史中丞臣職在彈擊官邪苗傅等悖逆肆虐擅行殺戮十六日遂具章乞告示傅等便宜軍法只得

行於所轄兵卒其餘當聞之朝廷付有司以正刑典又傅等日至都堂與朝廷事臣慮威福之柄下移不敢受死抗章極言謂朝廷近日差除多出苗傅劉正彥之意而二人更迭出入都堂殆無虛日其所以敢爾者必恃兵之強也王莽之兵非不强也昆陽一敗莽卒授首乞告示苗傅等太后不欲降出臣章疏恐傅等致害於臣及再上殿懇請乞降付三省以告示之使傅等知畏縮則足以正朝廷之綱紀使其肆橫害及臣身亦死職事臣不當避遂降出臣章疏傅等果出恣言謂直擬其為王莽雖懷恨疾然亦少戢兼



聞以簽書樞密院召呂頤浩以禮部尚書召張浚又分張浚之兵五百人歸陝西及浚不受尚書之命浚不肯分所部兵遂謫浚以散官居郴州擢浚以節度知鳳翔臣知皆出傅等奸謀假朝命使外無強兵謀臣内生變亂事不可緩遂一章乞留呂頤浩知金陵一章言張浚不當謫而求有膽氣謹密可共事之人得奉議即向令為客旅徒步如平江見張浚等具言城中之事令嚴設備大張聲勢持重緩進使其自遁無致城中之變驚動三宮此為上策撰杜鵑詩四句親寫令携去執呈諸人以為信驗詩云杜鵑飛

無定棲寄巢生子百鳥依園林花老晝夜啼安得百鳥挾以歸取杜甫詩言蜀天子化作杜鵑生子百鳥巢之意以杜鵑喻天子以百鳥喻百官言內外百官當同心共謀挾天子反帝位而歸宮也向至平江以詩徧呈張浚呂頤浩劉光世張浚莫不嗟嘆至二十六日忽聞宣詔降陛下為元帥降新帝為監國太后獨垂簾聽政臣具章留百官班同宰執從官上殿論列謂太后聽政所以保有宋宗廟社稷今乃使趙氏子孫不得居帝位二十日之間降二皇帝使天下無君詔書一出則天下首賦不至必有仗義而起兵者



蒙太后開納宣諭褒美令臣往都堂商議遂得不降  
詔書於四方漸謀復辟擢臣備員樞府三日而陛下  
復寶位此臣於陛下處別宮之後所言所行之事也  
伏望陛下於萬幾之暇特賜睿覽臣無任惶惧之至  
奉聖旨此可報行

右樞密鄭公已酉三月末家問一通尋復辟而上此奏  
四月七日有旨報行距今六十餘年後生往不記其  
全文金匱大書既難輒覩龜山誌文亦載大畧故因公  
之孫出示此卷備錄奏篇而題其後紹熙庚戌八月二  
十六日

書張欽夫拭劉文潛煇與蔣邕州書

亡友張欽夫劉文潛皆眼高四海未嘗輕以一字許人  
先後帥桂林聞張邕州遺愛及華夷大書至數百言推  
是以考其平生則張安國之銘豈諛墓者壽祿不于其  
身有子而才自宜光顯於世而礪也三抑於春官六十  
未離選調以此知遠方賢能阨窮不少矣予嘗在進退  
人材之地深有愧於斯文紹熙元年九月甲子

題與王洋手書

泉江王嘉謨早以經術詞章首鄉舉名聲籍籍晚仕州  
縣止於選調人皆惜之二孫種學績文不忝乃祖携予



頃歲書帖相過請記於後讀之恍然殆如隔世芻狗已  
陳豈應復盛篋衍蕉鹿雖在未知其為彼夢耶我夢耶  
紹熙改元九月二十四日

跋楊忠襄與鄉人羅錡詩帖

右忠襄楊公與友人羅錡士廉詩帖各二羅之姪孫泌  
實藏之予聞楊司業告諸生曰學者所以學為忠與孝  
也方政和中二公同游不學每以是相勉不幸士廉年  
總三十一死親之喪鄉人推為孝子名士胡份兼美實  
為之銘厥後忠襄遂死於忠國史書之萬世仰之平生  
取友如此賢矣哉紹熙庚戌十月一日

題郭知章告身後

右內翰郭公自玉堂出帥南陽告身一通其曾孫積中  
得於浸漬之餘携以相示亦可謂之名臣矣惟紹聖以  
來權臣用事居言路者人知其難既晚入黨籍則大畧  
固可考云紹熙元年十一月五日少保克醴泉觀使益  
國公周某

書龔夬傳後

徽宗實錄進于紹興末重脩成書在淳熙之四年龔公  
一傳微有增損要是後錄為詳如論郝隨鄧洵武前皆  
畧之比歲所進四朝國史列傳益取諸此初乾道中公



曾孫頤正嘗請中書舍人張君孝祥書舊傳刻之石今復俾某題其後乃錄新傳以遺之惟公學術豈晚生所敢輕議至於守道不阿尚可推考方王荆公不喜春秋公則詳為之傳知非苟從王氏者迨元祐初司馬文正力闢王說公乃反覆申辨不為少屈文正雖有習氣之語不害其為篤實也厥后哲宗疑元祐大臣出公于外而公奏陳之意猶前日所以對文正也二三十年間士大夫徇時向背者多公獨始卒如此是宜人主信之學者尊之勁正如鄒忠公序公易傳至謂其說可與易偕行不朽而以門人自名則公學術可知矣公父諱大同

號括蒼名士子若孫立身蒞官皆不苟至頤正博通史學嫻於辭章諸公交薦諸朝天子特命以官今居姑蘇閉戶著書近世言儒門者推龔氏云紹熙庚戌十一月十三日

題郭彥逢庚午解牒并易辨說

紹興庚午廬陵郡秋試數千人預貢者六十有一郭君彥逢名在第五又魁易之一經其才學可知已時君年過五十不復西笑故解牒猶在其孫特起同文藁襲藏惟謹復著易辨十篇自乾卦至繫辭皆為訓說謂予昔忝同升携以相示追惟四十年間所謂六十餘人存者



殆若晨星其子若孫能以一經傳家如郭氏者鮮矣予  
聞萬安為邑在熙寧五年今將兩甲子英才項背相望  
策第大常何為寂寥念爾祖而破天荒不在此時乎尚  
其勉之哉紹熙庚戌十二月十二日

記李太白廬山詩

我本楚狂人鳳歌笑孔丘手持綠玉杖朝別黃鶴樓  
五嶽尋仙不辭遠一生好入名山遊廬山秀出南斗  
傍屏風九疊雲錦景張落明湖青黛光金闕前開二  
峰長銀河倒掛三石梁香爐瀑布遙相望迴崖沓嶂  
凌蒼翠影紅霞映朝日鳥飛不到吳天長登高壯

觀天地間大江茫去不還黃雲萬里動風色白波  
九道流雪山好為廬山謠興因廬山發閑窺石鏡清  
我心綠蘿開處懸明月早服還丹無世情琴心三疊  
道初成遙見仙人綵雲裏手把芙蓉朝玉京先期汗  
漫九垓上願接盧敖遊太清

廬山之南有尋真冲虛觀古名詠真道書真誥述三十  
六洞天而詠真為第八七十二福地廬山為元辰福地  
是觀即詠真洞天五老峰正在其後唐貞元間女冠蔡  
尋真居之因以名觀後有白龍潭飛瀑注焉舊史云漢  
武帝過九江築羽章觀於屏風疊下臨相思澗今五老



一峰疊石如屏嶂蓋其故地潭上有綠淨亭右見熙寧  
中陳令舉賢良廬山記乾道丁亥十月己未予來遊宿  
烏明日登採訪使者閣望疊石峰僅在百步間相連即  
獅子峰石山無草木曉日下照宛如赤城竒姿巧勢不  
可名狀乃取李太白屏風九疊雲錦張之句題其榜曰  
雲錦閣龍潭在觀後里許水作琉璃色其中數尺正黑  
知觀湯善翔云深數十丈相傳為洞天之門未知然否  
潭上有靈澤龍祠殆綠淨亭基耶淳熙己酉秋艤舟南  
康畧來山南不暇再往惟一至折桂登黃雲觀而歸回  
首舊遊垂二紀矣明年道錄皇甫居中以事來廬陵求

予書太白詩將刻之觀中欣然許之黃雲正倚五老雖  
晚出然登覽最遠前守朱元晦所創其名亦出此詩云  
紹熙庚戌

跋太和樂南金所藏樂史慈竹詩

慈竹亦名桃枝竹唐王勃喬琳皆嘗為賦勃云叢生枝  
茂天長地久萬牴爭盤千株競糾如母子之鈎帶似閨  
門之悌友琳謂九族睦叙孝友威儀是竹必滋五服相  
殘骨肉携離是竹必哀苟自家而刑國亦觸類而增思  
其於摹寫諷諭固已畧備又得本朝留臺樂公此詩然  
後懲勸之旨粲然畢陳於前凡在士庶自當家傳而人



誦之况公苗裔乎刻之宜矣紹熙元年九月二日

題韓文公黃陵廟碑

孔安國釋書陟方為升遐言簡而意通學者可類推也韓文公作黃陵廟碑乃訓陟為沒蓋疑東南卑下宜言下方不當言陟遂以方乃死為釋此陟字其說雖新其竊有疑為不敢引他經為證姑以伊尹告太甲質之其曰升高必自下陟遐必自適蓋以陟遐為陟遠也舜自中國南巡非陟遠乎况地勢雖下其間自有崇岡峻嶺何害其云陟也大抵古文簡少一字數義如爾雅以初哉首基肇祖元胎俶落權輿為始故注詩者釋訪落為謀始可謂簡而有據矣然則楚詞餐秋菊之落英其指初英無疑或者不思訪落之意直以為隕落遂至輾轉相譏其失遠矣因文公之譏併及之

省齋文藁卷第十八 終



省齋文稿卷第十九

周益文忠公集十九

題跋六

跋揚愿與王伯芻詩

愿伏承駒父秘校惠示見和鄙句七言四韵二首降  
歎之餘因成二絕往謝幸幾笑覽愿悚恐再拜  
冷官廳事客來稀種綠陰：結夏惟忽得君詩  
惬人意陶家風到北窓時

只今侍讀周夫子屢說君詩似杜詩速把冠塵盡彈

却玉堂宵直伴王維

愿數見侍讀侍郎周文盛稱駒父詩有句法故後篇及之

同年揚謹仲清江儒宗尤工詩仕雖不遇而門人登高



第歷顯官者相望也年踰七十自吉州教官奉祠而歸  
予頃在翰苑得書云東坡直玉堂讀李端叔詩用伴直  
難呼孟浩然事詳考新舊唐書王維傳皆不載魯入翰  
林况禁地亦非外人可至疑蘇公自有所據然以今觀  
之恐無是事蓋諷予不能引類爾他日復寄聲云古今  
無詩人監廟予亟懇當路以車輅清曹招之謹仲纔拜  
命即掛其冠後數年乃卒今覽贈王駒父詩再引維事  
見及猶前書之意也按唐李肇翰林志明皇初改北門  
學士為翰林待詔張說徐堅張九齡徐安正相繼為之  
而不及維後又改為翰林供奉計一時材藝之士畢集

其中如維能詩善畫有清名固宜預選新史既採雜說  
載伴直事于浩然傳則維傳自不必書矣謹仲亦善畫  
戲見予家舊畫草虫因作八物于後至今藏之每懷其  
風度未嘗不悵然也紹熙二年二月三日

書韓忠獻王帖

治平四年九月魏忠獻王罷政判鄉郡會經度四事十  
一月改判長安前守天章閣待制王舉元先一月徙陝  
西都轉運使以龍圖閣直學士吳中復代之度未至而  
忠獻實來俄又徙舉元知慶州改命天章待制孫永漕  
陝西前一帖與都運待制得非舉元或永乎其云欲到



驛亭攀違承在朱宅疑彼不敢受謁故避于他所王侯  
暮夜方違此簡賓主之敬然後兩畫後一帖與叅政尚  
書即趙公叔平也末題正月七日而紙背乃卯立張祐  
訴牒猶稱治平五年者是歲正旦改熙寧元年詔書未  
到耳趙公是月二十三日自禮部尚書叅知政事出守  
徐州通問時尚在朝也始予幼年猶見士大夫簡尺多  
起草蓋幅少辭寡初不為勞稍長頗藏名公親帖以比  
集本所載類經刪潤如六一先生書稿尤多王晚年名  
位德業盛矣其于尺牘尚毋不敬今之後生肯如是乎  
紹熙二年二月十八日四世孫新全州使君邈來求攷  
訂因為及近事且以成亡友劉子澄之志云

題楊廷秀浩齋記

友人楊廷秀學問文章獨步斯世至於立朝諤々知無  
不言々無不盡要當求之古人真所謂浩然之氣至剛  
至大以直養而無害塞于天地之間者師友淵源厥有  
自来今讀浩齋記乃知嘗受教于劉公々之賢可知矣  
其載河南夫子之問與昔范淳夫以程伯醇語陳瑩中  
殆一律耶廷秀此記不愧沈矣紹熙辛亥四月既望

跋歐陽邦基勸戒別錄

淳熙甲午秋永新歐陽邦基壽卿攜書過予溜々千八



百言予愛歎其才每以進修勉之而壽卿素慕龍舒王日休之為人讀其居戒錄及淨土文而悅之嘗著勸戒別錄求予為序予固未暇也後十有六年奉祠來歸壽卿之錄益詳凡經史百家所記與夫近世士大夫善言善行皆聚而筆之析為三卷總十五門又刻鋤惡種德篇及勸修西方淨業文散施于人惟恐聞者不信傳之不廣視日休益鴻雁行也連歲踵門伸前請予曰如子之志雖充棟宇汗馬牛且不能盡曾是三卷安得謂之成書以要言之諸惡莫作眾善奉行兩言足矣士固不待勸中士必知所擇下士或思戒焉彼誨諄而聽貌者非所計也壽卿請題其後不復求序云紹熙二年四月二十六日

書安福劉德禮家紫芝詩卷

安福劉君德禮暨諸弟皆以文行稱予鄉淳熙丁未冬葬其母太安人紫芝產墳左明年又生邑人賦詩記之以予嘗與其先人同預鄉舉來求一言予不暇遠稽方冊姑用本縣故事為證昔安福令歐陽萬五世孫柳實文忠公之曾祖歷仕南唐家于安福性至孝兄弟相友爱有紫芝一莖兩葩生于楹鄉人以為孝德所感為著賦頌享年九十四累贈太師中書令後裔仕宦不絕今



劉氏兄弟孝友競爽天應兆矣積善不已則顯親揚名  
何患不歐陽氏若乎天 人不因尚其勉旃紹熙辛  
亥四月二十九日

豐城府君便山處士唱酬詩卷

六一先生送佛者慧勤三章雖極道山中之樂而謂不  
可久者蓋惜其才之甚良自棄于無庸欲反之正耳若  
豐城府君非服胡而顛童也既有妻兒之團圞又以酒  
果蔬薪足以供伏臘雲泉松竹足以娛耳目且與便山  
處士為隣朝夕酬唱是真得山中之樂者使六一先生  
見之必將勸其可以久則久豈復遲子之迈耶

題送陸先生赴省詩卷

紹興庚申伯父寓贛州招上庠舊同舍太和陸先生

府字

聖修居館下命子姪輩從其學辛酉冬辭赴春闈此送行

詩卷也時初得雩都羅愷教授所傳駱賓王集善本七  
兄戲效其體作序頃刻而成託名尚親長道詩則尚自  
為之第二篇乃大兄所賦以上惡札皆予筆也第三篇  
大兄為二兄作仍代書為第四第五篇七兄與予自賦  
自書第六篇十弟第七篇李親及之詩并字亦出于手  
當是時長道年二十有五大兄二兄遮少一歲及之年  
十有九七兄年十七予年十六十弟又少二歲今五十



年矣中間陸氏子以元本相遺留置篋中紹熙辛亥五月二十五日因曝故書覽之太息益長道大兄十弟墓櫛森然惟予與二兄七兄白首相從而及之猶居贛云  
某題

題山谷與韓子蒼帖

士大夫少負軼材其詩章固已超絕然須經前輩題品乃自信不疑正如參禪雖有所得猶藉宗師之印可耳  
陵陽先生早以詩鳴蘇黃門一見比之儲光羲豎與徐  
東湖遊遂受知於山谷晚年或置之江西詩社乃曰我自  
學古人豈所謂魯一變至于道耶紹熙辛亥八月一日

跋韓子蒼詩草

陵陽先生詩草友人陸務觀既刻石臨川又為跋語不容復措辭矣先生諸孫籍携以相示為一唱三嘆最後贈張景方一篇由今觀之殆夫子自道也尚半存僅勉燭六字印本互易之比藁為勝務觀謂未必皆定本諒哉籍其善守之紹熙辛亥八月一日

跋杜初公詩

右杜初公酬九華吳殿院鼠鬚筆古律詩各一篇吳名宗復字仲庶至和甲午秋自殿中侍御史因論大臣出倅虔州未至改守池陽乙未冬復入臺公詩作于此歲



時年七十有八又二年而薨仁錄本傳云晚年喜為草書而歐陽公與公詩亦云言無俗韻精而勁筆有神鋒老更奇皆紀實也蔣公穎叔心慕手追跋語教十字蓋得其彷彿云先是淳熙初元公四世孫立道已刻石祁陽今其弟新會昌宰至道復示真蹟敬推歲月題其後紹熙二年歲次辛亥八月六日

題胡邦衡講筵詩卷

中興以來侍從百司燕饋之費率取辦于臨安每歲經筵開講讀及修注官會于學士院府吏治具以為常住講亦如之紹興壬午壽皇初即位力修節用裕民之政

守臣趙子瀟因條具異時雜費悉罷之歲省緡錢一二十萬歸之朝廷講會其一也是年秋洪遵景巖以翰林承旨兼侍讀其時為起居即與洪議用學士院餐錢置酒五行以毋廢故事後遂為例逮乾道庚寅秋益九年矣其以秘書少監兼直翰苑既費自我出則與院官鄭仲益侍郎同約客而以非經筵官不赴坐此忠簡胡公見懷之詩所為作也今二十年真蹟尚藏予家因公姪濟以予和篇紙弊墨渝來求別書併取原詩畀之然當時忠簡公第見供張假之臨安遂以為肆筵甚盛不知事始如此其後壽皇復以所省緡錢歸臨安于是燕饋



如故惟講會學士院仍自為之蓋其費初無多耳明年  
某遷禮部侍郎既仍舊直又兼侍講復增三勸為半日  
之數至今不廢云此卷唱酬凡九人惟某與趙子直尚  
存可為永歎紹熙辛亥十月二十五日益國公周某書

題趙鑑堂快閣詩

鑑堂趙公和山谷太和快閣詩詞翰殆可相亞當時刻  
石邑中至今猶存又嘗錄小字本寄其弟湖州使君豈  
平生得意句耶湖州孫帥奭實藏寶不敢失墜來宰太  
和既重修此閣盍併刻此詩如顏魯公麻姑壇記不妨  
大小字俱傳也紹熙二年十一月二十四日題于長沙

淳古堂

題方季申所刻歐陽文忠公集古跋真蹟

通天下郡邑凡賢傑之鄉與其宦遊之地往：揭名公  
字繪像以事非獨誇耀今昔亦惟高山仰止景行：止  
期有補于將來歐陽文忠公文章事業師表百世佛者  
惠勤尚能于公平昔不到之地以六一名其泉廬陵公  
父母邦也而夢奠兩甲子祠堂僅列于學宮歷刺史不  
知幾人芝草雙蓮何物草木乃得記瑞名堂若亭獨于  
公置而弗及此何理也母乃謂公生于綿長于隨仕于  
朝家于穎雖中間葬母一至永豐則又函服不入公門



遂相忘于道術與紹熙元年太甫陽方侯實來首創六  
一堂貌公其上以備闕典復訪求集古跋真蹟擇良工  
摹刻之日聚月裒旁搜遠取凡得二百五十餘篇以較  
印本其未獲者終百餘篇指授點畫殆類親筆非石刻  
比也會從節廣東猶捐俸携工以竟斯事其用力至矣  
昔韓文公以六經之文倡于唐而其遺書初因公大顯  
厥後遂以文六經之文鳴于宋蓋傳道之宗在焉今侯  
篤志韓集箋校討論始四十年傳錄無慮數百家然後  
定著善本既收廬陵復尊事公于故鄉以風勵學者其  
有補于斯文豈少哉書來俾之掛名卷末不得而辭也

三年二月七日周某書

書東坡宜興事

買田陽羨吾將老從初只為溪山好來往一虛舟聊  
從造物游一有書仍懶著且慢歌歸去筋力不辭詩

要須風雨時

右調菩薩蠻

歸去來兮清溪無底上有千仞崖峩畫樓東畔天遠  
夕陽多老去君恩未報空回首彈缺悲歌船頭轉長  
風萬里歸馬駐平坡無何處是銀潢盡處天女  
停梭問何事人間久戲風波願謂同來穉子應爛汝  
腰下長柯青衫破群仙笑我千縷掛煙簑

右調滿庭芳



余居黃五年將赴臨汝作滿庭芳一篇別黃州既至南都蒙恩放歸陽羨復作一篇

丈夫志四海我願不如老親戚共一處子孫遠相保  
觴絃肆朝日尊中酒不燥緩帶盡歡娛起晚眠常早  
孰若當世士冰炭滿懷抱百年歸立壟用此空名道  
元豐七年十月二日宜興舟中寫東坡居士記陶淵明詩  
吾來陽羨船入荆溪意思豁然如愜平生之欲逝將  
歸老殆是前緣王逸少云我卒當以樂死殆非虛語  
吾性好種植能手自接果木猶好栽橘陽羨在洞庭  
上柑橘裁至易得當買一小園種柑橘三百本屈原  
作橘頌吾園若成當作一亭名之曰楚頌元豐七年

十月二日書 楚頌帖

宜興主簿朱克卿續編本縣圖經載東坡以事

黃土去縣五十里東坡與單秀才步田至烏地主以  
酒見餉謂坡曰此紅友也坡言此人知有紅友而不  
知有黃封真快活人邑人舊傳此帖今止  
長橋元豐元年火焚四年邑宰褚理復立榜曰欣濟  
未幾東坡過邑為書曰晉周孝侯斬蛟之橋刻石道  
傍崇寧禁錮沉石水中  
東坡初買田黃土村田主有曹姓者已鬻而造訟有  
司已察而斥之東坡移牒以田歸之



邑人慕容輝嗜酒好吟不務進取家于城南所居有  
雙楠並植如蓋東坡訪之目為雙楠居士王平甫亦  
寄以詩

某自紹興癸酉迄淳熙己酉三十七年之間凡六至宜  
興屢欲考東坡在此月日而未暇也今者避暑杜門因  
覩楚頌帖畧哀遺迹如后七月二日東里周某某題

蘇文忠公以元豐七年量移汝海四月離黃州五月訪  
文定公于筠七八月之交留連金陵遂來常州度九月  
間抵宜興聞通直觀側郭知訓提舉宅即公所館不知  
凡留幾日也今觀楚頌帖及公曾孫季真所藏淵明丈

夫志四海詩皆題十月二日又云宜興舟中寫計留宜  
興不過旬餘復回郡城自此遂趨汝州過泗遇歲除八  
年正月四日乃行道中上書乞歸常三月六日至南京  
被旨從所請回次維揚有歸宜興留題竹西三絕蓋五  
月一日也同蓋震遊常州僧舍詩云湛湛清池五月寒  
而謝表謂今月二十二日到常州訖其為五月無疑是  
月被命復朝奉即起守文登次韻賈耘老云東來六月  
井無水仰看古堰橫奔牛七月二十五日與杜介遇于  
潤之金山贈以古詩八月二十八日復贈竹西無擇長  
老絕句則在道月日歷：可考其冬到郡五日而召自



此出入侍從以及南遷靖國辛巳北歸竟薨于常不暇踐種橘之約矣其帖今藏寓客董伯栻家董氏世為東秦名儒曾祖暨大父在高皇時繼掌外制士林榮之伯栻亦篤學嗜古能濟其美者也

公熙寧中倅杭沿檄常潤間賦詩云惠泉山下士如濡陽羨溪頭米勝珠又有買牛欲老地偏俗儉之語卜居益摧輿於此

滿庭芳詞作于元豐八年初許自便之時公雖以五月再到常州尋赴登守未必再至陽羨也軍中謂壯士馳駿馬下峻坂為注坡其云船頭轉長風萬里歸馬注平

坡蓋喻歸興之快如此印本誤以注為駐今邑中大族邵氏園臨水有天遠堂最為奇觀取名于此詞云

元祐八年五月十九日任禮部尚書辨御史黃慶其論買田事云謫黃州日買得宜興姓曹人一契田段因其爭訟無理轉運司已差官斷遣不欲與小人爭利許其將原價收贖今公之孫曾猶食此田豈曹氏理屈不復贖耶抑當時所置不止此也

三年前寓陽羨嘗考坡公到邑歲月書于楚頌帖之後茲來長沙值二別乘皆賢而文南廳張唐英毗陵人北廳蘇仲嚴則文定公四世孫也復書以遺之紹熙壬子



五月一日重題

題權邦彥草書舞劍器行

樞密權公進士起家當靖康擾攘偕宗澤邀擊金虜功雖不成斯亦壯矣旋以智畧被遇高廟紹興初由兵書踐西府未滿歲薨于位不及有所設施今觀草書杜工部舞劍器行龍蛇飛動得顛張醉素之遺意前輩文武自將不名一善大率類此後題庚戌中元蓋年五十有一辭免起復發運使時所書風塵瀕洞王室昏殆有感云紹熙壬子七月二十一日

題張無垢手書

永嘉陳求仁同僚期月端方篤實相助為多臨行出無垢張公與其先君子手書二十幅乃知父師淵源有自来矣其云大學一篇學者入聖域衢路又云聞見所得不如踐履之深又云接事遇物于不可意處試吾所得此最親切者又云閉目潛視六十以前已行是非自進自退亦一快也凡是四端所以修身所以誨人周禮盡在魯矣尺牘云乎哉後有汪玉山一帖蓋守東陽時也紹熙壬子八月十日

題吉水宰陳減孫邑計錄

不曾與

廬陵民繁賦重調守甚艱而支邑號吉水者地當孔道



為令尤難緩則政弛急則訟興不以計免輒以罪去吏部南曹榜闕于門選人過之側睨不敢就淳熙末部以闕上三省時予當軸故識修職即陳減孫以其修身知其能治人以其篤學知其能勤民乃奏而授之或譏朝廷不當除令予笑曰開元盛時明皇親策縣令于宣政殿擢韋濟宰醴泉令倉庫門尹吏至早者皆得進擬守令固號民之師帥乃反不可况堂除大縣中興自有定制耶或者乃已明年予罷政歸田里過其邑則民愛之吏畏之異時人情窘迫煎熬之態雍容愉怡矣官府摧敗荒廢之餘葺治嚴整矣部使者交薦于上士農工商

爭舉留於下予喜問減孫何術致此也徐示邑計錄一編則凡二稅雜征財用出納皆推求源流考正名色區分件別隨事登載且言予曰朝廷何嘗加賦于民何嘗不輸賦于官身不正則吏奸肆治不勤則事失序當取而不取不當取而征焉此之不察一取成于吏富家日富貧民日貧無惑乎督責紛然于上鞭笞日及于下也當是時願歸咎于賦重而人頑不亦悖乎減孫請予題其後以告來者予曰良將不學孫吳自足取勝若讀兵書而未悟反足致敗名醫治病在意不在藥彼庸夫淺識輕用古方則雖參苓不必愈疾人存政舉自有活



法此何為者不果作減孫代去既數月邑之秀士來言  
曰吏鮮去思久矣今于陳君其庶幾焉將刊計錄願求一  
言乃為詳記舊說以慰邑人之心紹熙三年九月十九  
日

題揚文卿芾詩卷

吉水揚公詩句典實可以觀學問之富字畫清壯可以  
知氣節之高仕不于其身必利其嗣人今秘書監廷秀  
其子也辭章壓播紳忠鯁重朝廷零陵主簿長孺其孫  
也如花之正芳如驥之方驥詩云維其有之是以似之

紹熙三年臘月五日

跋東坡詩帖

瀏陽丞新喻蕭君一致五世從祖潛夫元豐七年監盱  
眙倉坡公歲除前過其東軒留題二詩益量移汝州時  
也按盱眙隸泗州：在淮北縣治其陰故都梁號淮南  
第一山景物清曠公既樂之而潛夫諱淵益慕陶靖節  
者其人又可知矣此公所為賦詩也今廬陵闔闔中有  
樓甚偉江山滿眼徐師川以淮勝名之舊在官倉廨中  
承平時監當頗為美仕廣州至號八仙故倉庾氏所居  
往：有登臨燕息之地名勝或遷謫而來秩高或折資  
而授今著令猶與本縣令序官近世勞苦卑猥無復官



况撫卷為之三嘆紹熙四年正月二十五日

跋黃魯直與蕭氏書

故河南少尹新喻蕭公諱從字從義宰分寧日山谷嘗  
修桑梓之敬崇寧壬午寓武昌作此書尋謫宜州未暇  
卜居漢陽也後九十有一年當紹熙癸丑正月二十一  
日少尹曾孫瀾陽丞一致以示周某謹題其後

跋南豐黃世成銘文

南豐壺隱黃君遜門蔭者二而名弗遂委家貧於季而  
用則匱志大學博所向落：積善為仁乃不久生自常  
情觀之可謂四不幸矣雖然不輕許可如陸子靜而序

之以銘老子文學如謝昌國而弔之以文揚廷秀今之  
歐公也挽君有詩李子經鄉之秦伯也哀君有辭兼是  
四者傳之後世非大幸與假令君而貴而富而合而壽  
雖有得於身必無聞于久殆未可以此易彼也因其子  
枏不遠千里來求跋語故書以遺之慰夫無窮之思焉  
君諱文晟字世成紹熙四年二月六日東里周某

跋壽皇御批魏杞講和時奉使奏劄

魏絳勸晉侯和諸戎狄左氏美之丞相壽春公得非苗  
裔與何隆興和戎復出其手也雖然山戎納虎豹之皮  
而請盟為力易耳公當狄師在境親冒矢石間關通問



然後得其要領視古為難故晉僅賜金石之樂而公乃  
藏雲漢之章其輕重亦不侔矣後三十年公之子通判  
潭州熊夢湖南轉運司幹辦公事驥稱出此軸示臣周  
某敬題其後紹興癸丑三月二十八日

跋劉忠肅丞相帖

右忠肅公晚年與張浮休尺牘其第三幅分寫四事而  
繫以名更無冗語可以為法紹興癸丑四月中澣公之  
元孫無玷無欲以示周某謹附名于後

跋三游詩

右三游詩總一百七十篇陳胃字聖予其先淮南人而

家于衡熙寧中郡守王中扣延為石鼓山長時忠肅劉  
公自御史謫監益命與二子同遊南嶽馬上唱酬集為  
三卷公親以長篇繼之詞翰俱美士大夫所當寶藏况  
其曾玄乎純亦後改字斯立眾允改字公允困于黨籍  
皆不達聖予亦未嘗仕云紹興癸丑四月二十二日  
周某書而歸之劉氏

跋盛子謙座中銘

盛公手書座中銘總二百二十字皆盛德事也以此訓  
于後人其興可必至孫文肅公被遇仁皇遂參大政衣  
冠相承迄今不墜蓋自周廣順元年距紹興癸丑凡二



百四十有三年立言垂範昭厥豈無基耶八世孫文林  
郎新信陽軍判官求道由長沙以示郡守周某敬題卷  
末七月二十二日

書杜孝恭所記王宣功伐

紹興隆興之間荆襄都統制王侯宣扞禦金賊收復唐  
鄧經營汝洛戰勝攻取功冠諸將予為秘書少監每于  
日曆中見其所上方畧後入西府與邊帥論近世名將  
往：推侯為首侯既沒兩路帥守監司列奏軍民思宣  
萬口一辭最後江陵帥張栻欽夫奏乞立廟加贈諱：  
數百言淳熙六年詔以節鉞告侯第非常典也其壻新

賓州守杜孝恭嘗從侯歷行陣故詳記功伐予實其  
說夫舅甥親也喜言溢美理或有之然日曆乃信史邊  
帥皆公論兩路非私請欽夫又不輕以功名誦人獨稱  
侯有邊功且謂士卒每及侯輒咨嗟流涕如談古人嗚  
呼此豈溢美哉為書其後使告太史氏孝恭亦慷慨事  
功其智勇可用他時當牽連得書矣紹熙癸丑八月長  
沙郡守周某題

題沈傳師碑

道林以四絕名堂沈居其一歲久堂壞葺而扁之又得  
沈碑于公帑移置堂上別刻本留郡齋紹熙癸丑十月



旦假守周某題

題向士伯所收温公竚瞻堂額

文潞公出入將相書考四十勲業光明士民歌舞之其所至名堂多矣惟竚瞻本裕陵之賜詩得威因西戎之獻馬又得司馬文正公蘇文忠公作記與銘故二堂尤章：在人耳目今復獲敬觀文正所題榜使僕生于當時雖為之捧硯所忻慕焉紹熙癸丑會慶節周某書而歸之向氏

題印山羅氏一經集後

六籍火于秦易繇卜筮傳者不絕詩誦人口非專竹

帛故二經獨賴以全本朝大儒歐陽公猶致疑于繫辭則其專心致志者詩而已蓋嘗因毛鄭箋傳為之圖譜議者謂公平生溫柔忠厚茲有助焉今江西通經之士固多而詩學尤盛于廬陵印山羅氏又其淵藪三歲舉于鄉殆無虛榜六十年間父子弟兄登科第者七人如川之方增也夫經明必行修豈徒解頤拾青紫而已他日採詩之官出觀風俗考得失使溫柔忠厚之教不在乎他邦非大成與予雖老尚及見之紹熙四年十一月七日

高宗御批錢伯言奏跋



右己酉歲二月十日錢伯言所上御舟宿頓奏後有高  
 宗皇帝宸翰二十九字御押在焉蓋行在秀州時也初  
 帝于是月三日壬子南渡幸鎮江府伯言先以龍圖閣  
 直學士為守至是充巡幸提點一行德錢糧頓遞官癸丑  
 駐驛丹陽縣甲寅次常州乙卯次無錫縣丙辰次平江  
 府丁巳少休戊午次吳江縣之平望己未次秀州乃批  
 此奏今史局有自元符庚辰至己酉六十年間日錄或  
 云陳瑋所纂具載庚申發秀州次長安閘辛酉次杭州  
 實如批語而著作局日歷作庚申宿崇德辛酉次臨平  
 壬戌抵抗則與伯言奏同未知孰是也伯言進樞密直

學士及錢糧頓遞之命日曆皆不書以數年因丐叙復  
 乃見殆搶攘中文書散逸後來省記疏畧爾新除秘書  
 少監臣孫逢吉頃為實錄院檢討官訪求逸事偶得此  
 本今既召還必將叅訂而一之伯言蓋總之子也紹熙  
 癸丑冬至日少保觀文殿大學士判潭州軍州事克荆  
 湖南路安撫使益國公臣周某某恭書

題潭州道林寺六絕堂

唐乾符中袁浩作道林寺四絕堂記蓋指沈傳師裴休  
 筆札宋之問杜甫篇章也本朝治平四年秋蔣之奇別  
 為記謂沈杜固無間言裴本學歐陽詢書寺幸有詢四



大字當為一絕又不應近舍韓愈詩遠及之間其去取如此今三人詩各載集中眾所共知惟袁記與歐裴字畫則不復存予既稍葺其堂訪沈碑而歸之復臨閣本歐書并襄陽僧舍裴所作八大字併刻於石蓋歐實郡人裴嘗收此俱不可廢合古今異同之論衍四為六其在茲乎後數日寺僧於朽壤中得大中十一年斷際禪帥傳心法要序乃小楷七其後段亦作裴筆真贋未可知也先是堂之題梁著馬氏五代時職位近歲修長沙志遂謂此名創于馬氏誤矣紹熙癸丑十二月旦郡守周某題

先太師潭州益陽縣清修寺留題記

靖康丁未五月一日高宗皇帝即位改元于南京八月四日先公太師以前太學博士被旨使荆南北路與提點刑獄官徧行所部會計金穀事載日曆時年三十有六明年戊申六月由長沙歷益陽如武陵郡道遊清修寺留詩一篇遺長老宗元而不著姓名因康君跋語始知大畧後六十四年當紹熙辛亥冬某叨鎮湘楚適天子新見上帝恩及諸臣之家而先公已封莒鄭邠漢魏唐六國矣即具奏願以此邦賜先臣履光乘傳之舊優詔從之遂昨潭國惟是歲月悠遠其在所部獨道州白



石洞有八月二十五日題名蓋自湖北回長沙而過春陵也遺事則不可推矣他日偶為諸邑言離騷為文章之祖既發端此地盍裒古今詩文刻以傳遠使學者知源流之有自于是益陽宰黃洪首募雜碑數十通來此詩在焉初未知為先公也覽之瞿然讀之潛然殆天誘其衷使心聲于澤久晦復彰以明示神靈來燕來寧之意乎夫生而將命沒而胙土且幸不肖之孤攝官承乏表而出之是皆宜書會主僧善信求叙本末敬書其後四年歲在癸丑十二月一日嗣子某謹記

跋劉提刑家六帖

米元章詩

米南宮辭翰妙絕一世東平劉氏藏之久矣紹熙癸丑臘日周某獲觀心目為之開明

陳大諫

右陳瑩中詞翰皆與劉斯立者曾孫無玷無欲實藏之以示周某敬題其後紹熙癸丑臘日

宋宣獻呂汲公

劉忠肅公四世孫無玷無欲家藏宋次道呂微仲四帖紹熙癸丑臘日周某敬觀

蘇黃門



石蘇文定公與劉忠肅公父子四帖 紹熙癸丑臘日周  
某敬觀

張芸叟

張浮休與劉忠肅五帖比尋常作字極不同益加敬耳  
紹熙癸丑臘日周某謹題

劉忠肅公辨誣本末

劉子駒手書辨謗始末當與蘇氏烏臺詩案並行于世  
足以知權臣誣陷之慘而聖朝昭雪之公也 紹熙癸丑  
臘日周某書

跋劉炳先家五賢帖

劉君光祖昭祖兄弟自廬陵徙家長少兩邦賢士如林  
王廬溪胡忠簡公劉子駒張敬夫楊廷秀又兩邦之喬  
木皆推其孝友或賦詩或作記或通問諄稱道予來  
假守人無間言甚可嘉也出示前五賢真筆敬題其後  
紹熙癸丑臘日周某

跋錢穆父帖

吳越錢氏子孫文章名世者無代無之穆父又以政事  
取知朝廷行誼見推善類尤可敬也此帖藏族孫長沙  
主簿選家紹熙癸丑臘日周某獲觀

跋折彥質燕社亭詩



承平時長沙郡圃燕祉堂在大池中聞甚宏麗兵火不存紹興三年二月帥龍圖閣直學士折公始葺亭于舊基明年冬移鎮桂林留六絕句一時膾炙人口後二十二年歲在乙亥直秘閣陳璘大新斯堂稍復舊貫而亭與詩亡矣又三十九年某從公之子大理正知常得別本方伐石摹勒會蒙恩改豫章亟刻板揭堂上使來者得覽觀焉紹熙癸丑臘日郡守周某題

省齋文稿卷第十九 終

省齋文稿卷第二十

周益文忠公集二十

序 附 訓說

皇朝百族譜序

君子之著書也有心於勸戒而無意於好惡然後可以施當今而傳來裔昔者世系之學蓋嘗盛矣姓有苑官有譜氏族有志朝廷以是定流品士大夫以是通婚姻然行之一時其弊有不可勝言者何也好惡害之也是以進新門則退舊望右膏粱則左寒畯進而右者以為榮：則夸：則必侈退而左者以為辱：則怒：則必怨以侈臨怨則生乎其時者悉力以逞憾出乎其後者



負名以自欺此正論所以鑿杜固義府所以陷不幸而無知如崇韜者所以流涕于尚父之墓而不耻也長沙丁公維臯宿學者儒慨然以譜牒為任未有聞而不求求而不得而不錄也日裒月聚殆且百家而又推其源流條其派別自微以至著由遠以及近疏戚窮達可指諸掌如嘗從其父兄而友其子弟也如與之同鄉黨而接姻連也不亦博而知要也哉維臯不鄙謂予使序其首予曰書不待序也然維臯之意不可以不明蓋世臣巨室則必書讀者可以知先烈之有貽而思保其闕閱也方興未艾則必書讀者可以知將相之無種而思大其門閭也至于四姓小侯重茵疊衮則知無兩漢敗亡之禍勳臣勞舊傳龜襲則知無三世道家之忌上以彰國朝人物之盛下以為子孫昭穆之辨向所謂有心於勸戒而無意於好惡者不在茲乎他日其得益多其編益詳上之太史傳之薦紳予亦將乞其副而寓目焉對千客而不犯一人之諱或可勉也紹興二十八年十一月既望東里周其叙

葛亞卿廬陵詩序

崇寧初元詔凡置學州並選教授二員明年故大司成葛公次仲以道德文學首應新書分教於廬陵方舍法



之行吏狗時好凡荅問稍與王氏殊者輒以異端坐之  
公獨越去拘攣寓意篇什其美刺比興深得詩人吟咏  
情性之旨不但貫穿今古摹寫物象而已時著錄於學  
者幾千人其承公講畫為文詞者皆有可觀故顯謨閣  
直學士劉公才邵年甚少才最高公力薦進之學問日  
成已而登優第掌內外制以歌詩名四方清婉有唐人  
風至今人皆樂道一時師弟子之美而未知公推賢揚  
善之必有後也隆興甲申公子右朝奉大夫立象來守  
此邦予是耆老播紳雜然稱曰夫數窮六十美周必復  
向司成之在吾州也亦以甲申謂天非報施耶何歲律

之適同也某竊按魏劉馥為揚州刺史聚諸生立學校  
後其子靖守廬江詔曰卿父昔為彼州今卿復據此郡  
可謂克負荷者惟公賢父子傳世濟美事適相類州之  
士人思欲明於大君紀於策書而不可得又欲歌武公  
之緇衣詠召伯之甘棠而不可盡乃相與哀公舊所留  
古律詩得二十七篇告於教授林仲熊將刻之石而俾  
余為序夫詩固非待序而傳也若公特立之搯好賢之  
心積善之報總：章：其實以屢氓與聞之隱而弗宣  
非人情也故為推本末而題其首十二月一日

送黃秀才序



宜春黃生景雲學廣而辭贍著詩文數萬言意欲窺鮑謝之堂與者國家舉場一開屠販胥商皆可提筆以入而生獨皇：烏望棘闈不得進是可閔也昔公治長越石父皆在縲紲一遇聖賢或明其非罪或贖以左騷其後卒有聞于世今生雖嘗為有司所誣幸會大赦名未掌麗丹書也特以不能昧吏抑厭至此嗟夫以生之才使其有過猶將推聖賢之心拂拭之况無過哉予誠憐生而力不足以振之生其歸本郡：守黃公賢者也予嘗識面烏仁必能哀生明必能直生或謂是當決之外臺予曰轉運朱公史公又賢之尤者也往並為尚書郎

予嘗同朝烏其好士也心益切其直枉也力愈大生而獻生之文陳生之詞其無以處生耶今年秋試吾必觀生姓名矣雖然預有以告生士之致遠先器識巨鼇之啓龍標之詩勿作可也乾道元年三月九日

葛敏修聖功文集後序

糊名取士若棄實務華然主司賢矣自有以得人蓋遺辭近古決非碌：之士而纖齷浮豔者違道之文也歐陽文忠公知嘉祐貢舉所放進士二三十年間多為名卿才大夫用此以求之與元祐三年東坡先生嗣典斯事即文觀行所得為多是舉也奉議郎葛公奏名第七



學問文章抑可知已後八十年其從孫濂携家集相遇  
使予一言昔我外祖給事中王公亦以古文論周秦強  
弱見知東坡置在前列已而廷試唱名第五政和中入  
掌書命專用西漢文體為用事者敲撼賴天子仁聖力  
保全之未幾竟坐元祐學術斥去予公益同年進士以  
道義言之又同門也則予與葛氏不為無契然而公之  
行實櫻寧李公誌之公之逸事杉溪劉公跋之其文則  
有澹菴胡公之序在振宣幽光三絕備矣復何言哉獨  
一事偶闕特書寧徵荆軻者有待夏無且耶予嘗觀書  
太史氏按崇寧元年九月乙未詔書定元符末上書和

等之百四十有一人而公姓名在焉由此罷確山宰廢  
於家越三年六月丁巳始出黨籍人謂公久困當少折  
其詩乃去云從今益勉為忠義一噎如何便廢餐味公此  
言夫豈以利祿得喪貳其心者使天不奪之年得進為  
於世不負東坡審矣况肯負國乎此事與吾外祖相類  
皆所謂不易乎世者故表而出之復以其書歸濂強  
學篤行為文有家法興葛氏者其在斯人與乾道二年  
十月八日

胡彥英論語集解序

論語記夫子善言簡易明白而褒貶勸戒實同春秋詳



弟子總而述之、時於稱謂尤為有法凡門人問答率稱子若夫子及對諸國君臣則姓以別之如是者十八九獨季氏一篇皆切責冉求之言每章必稱孔子無他絕之也此與春秋夷杞何異推類以求則行夏之時從周之文管仲之稱仁昭公之知禮筆削微旨皆行乎其  
中矣學林胡彥英辨博該貫泛通六藝諸子百家之書而以論語為宗古今注解自漢賈生揚子晉何氏唐韓柳氏周熙時子本朝邢氏劉原父歐陽子司馬溫公程正叔二蘇謝顛道數十家片言之相涉一說之可取如醫儲彙賈居貧惟患其不脩所得既富則徐為折衷而

以共先君子隱居口講與夫從叔侍讀公新說繫之又為叢書二卷掇拾遺餘集音二卷考證同異博觀約取期明道而後止謂予使序卷首予聞聖人之言若近而其旨甚遠仁者見之謂之仁智者見之謂之智雖大賢有不能盡况後學乎自漢以來乃始擅專門之業黨同而伐異欲以一說盡聖人之蘊斯亦過矣惟胡氏世傳春秋學英彥尤致意焉是書也集諸儒之說而以道為之權衡是非取舍不敢銖兩輕重其心間有旨雖殊而理同亦並存不廢務使學者優柔而自求厭飫而自趨非深於春秋能如是乎其用心過漢儒遠矣予故樂為



之書乾道六年四月日

續中興制草序

嘉祐中歐陽修建言學士所作文書皆繫朝廷大事示於後世則為王者之謨訓藏之有司乃是本朝之故實而景祐以後漸成散失於是以前類年次編為卷帙號學士院草錄中經兵火文人故家僅傳所謂玉堂集及大詔令者其全書不可得而見矣近歲承旨洪遵起建炎中興迄紹興內禪三紀之間得制草六十四卷序而藏之復十年於茲矣往者初上太上皇帝太上皇后尊號乃希世之潤典聖朝所未行有司失於稽考不以表

而以議且玉冊中有嗣皇帝臣某之文識者非之逮乾道六年郊祀慶成再行盛禮而臣適以謏聞寓鑿坡之直因據唐制請主上率群臣詣德壽宮上表陳請越十一月庚寅有旨恭依又按顏直卿闕崔器之議舊錄載順宗之冊凡表箋冊文止當稱皇帝臣某然後一代之制稍應古誼所謂文書繫朝廷大事者其孰加於此乎乃命院吏裒隆興以來舊橐繼遵所編而以尊號表文為之首其餘制詔等各從其類復增召試館職策問合三十卷繼今隨事附益則卷帙將千萬而未止在乎後之人不倦以續之而已八年歲在壬辰上元日左朝散



郎權尚書禮部侍郎兼侍講兼同修國史兼實錄院同修撰兼權中書舍人兼權直學士院臣周某某謹序

王元渤洋右史文集序

文章以學為車以氣為馭車不攻積中固敗矣氣不盛吾何以行之哉東牟王公之文吾能言之以六經為美材以子史為英華旁取騷人墨客之辭潤澤之猶以為未也挾之以剛大之氣行之乎忠信之塗仕可屈身不可屈食可緩道不可緩如是者積有年浩浩乎胸中滔滔乎筆端矣賦大禮則麗而法傳死節則瞻而勁銘記則高古粹美奏議則功直忠厚至於感今懷昔登高望

遠夏思愉快及摹寫戲笑一皆寓之於詩文大篇短章充溢箱篋嗣子昌祖懼夫散軼而無傳也釐為三十卷屬某為之序昔葉少蘊嘗問公劉貢父精於漢史以其謂杜詩功曹非復漢蕭何為誤用事信乎公曰高紀蕭何為主吏計孟康注功曹也王定國猶知之詩史豈誤哉少蘊嘆服公之於學可謂不苟矣官太學時實代秦丞相而直道正辭亦擯弗用晚守鄱陽洪忠宣適獲罪於奏無敢過其居者公獨修舍葢故事坐是罷郡方勢利之門大開既不闖焉又從而回之其氣何如哉故因論公文章淵源而以一事實之庶幾來者有考焉公諱



洋字元渤宣和未登甲科紹興初以右史贊善嘗命直  
徽猷閣歷典三郡所至有異等效云淳熙元年十月一  
日

周茂振樞密海陵集序

本朝沿唐舊西掖掌外制北門掌內制謂之兩制而非  
侍從近臣之通稱也太宗時四方砥平人材輩出專以  
是處文學器識之士禮遇非他官比二府有缺率於此  
取之惟參知政事蜀人蘇易簡尤被眷待其自兩制人  
中書猶未強任淳化二年御飛白書玉堂等四字以賜  
至今號為北門盛事炎祚中興時則有吾宗樞密公茂

振以雋明之才辨麗之文受知太上皇人皆以蘇公遇  
太宗為比年踰三十由館閣兼掌書命其後超拜掖垣  
入翰林三遷為學士每一制辭出學者爭相傳誦天子  
嘗褒諭曰卿久掌內外制中外士大夫咸稱得代言之  
體紹興三十年復大書玉堂二字賜之其視淳化若合  
符節公先世亦蜀人也後徙海陵登科者踵相躡所居  
歸叢桂坊世有顯人至公遂大用可謂盛矣公薨嗣子  
準哀遺集得二十三卷而內外制殆居其半蓋久官於  
朝故其他詩文因事而作者少然溫潤精切鼎鑿可知  
向使天假公年主盟斯文則述作之富雖至於百卷可



也準數以序為請予與公同宗朝不得而辭公諱麟之  
茂振字也淳熙癸卯正月十日

蘇魏公文集後序

至和嘉祐中文章爾雅議論平正本朝極盛時也一變  
而至熙寧元豐以經術相高以才能相尚回視前日不  
無醜疵之辨焉再變而至元祐雖闢專門之學開眾正  
之路然議論不齊由茲而起又一變為紹聖元符則勢  
有所激矣蓋五六十年間士風學術無憲四變得於此  
必失於彼用於前必黜於後一時豪傑之士有不能免  
况餘人乎若乃上為人主所信中不為用事者所疑下

常見重於正論惟丞相蘇公為然方仁宗右文公在館  
閣者九年英宗責實公首預監司省府之選神宗勵精  
公則掌制尹京出藩入從眷獎尤渥厥後大用於宣仁  
垂簾之際榮歸於秦陵親政之日歷事四朝始終全德  
獨為儒學之宗嗚呼盛哉平生著述凡若干卷翰林汪  
公彥章為之序某嘗得善本於丞相曾孫玘適顯謨閣  
直學士張侯幾仲出守當塗欣慕前哲欲刻之學宮布  
之四方使來者有所矜式其用心可謂廣矣故以遺之  
而紀於後淳熙十三年十月一日

張彥正文集序



有德之人其辭雅有才之人其辭麗兼是二者多貴而壽蓋以德輔才天之所助而人之所重也丹陽章簡張公秉懿好德所蘊者厚自其少年才名傑出英俊之上窮經必貫於道造行弗踰於矩發為文章實而不野華而不浮在西掖所下制書最號得體其論思獻納皆達於理而切於事尤喜篇詠格律有唐人風非如儒生文士止有偏長而已歷事三朝功名富貴曾無間言有以也夫某雖生晚紹興丙子管庫於朝尚及識公侍從執政時又因嘉禾聞人茂德從公子仲固游今復與公孫常平使者君量聯事於湖湘始盡得公遺文讀之回思

三紀前觀道德聽教誨如昨日也君景請記其後竊伏惟祖宗盛際名公巨卿抱負衆美遭時遇主躬備五福磊落相望至裕陵聖學高妙尤汲汲乎人才知元絳厚重而文擢參大政眷禮優渥年逾七十以資政殿學士歸老吳中錫賚寵行士林榮之有子岐嶷致身館閣不隕世美生保眉壽沒謚章簡文集盛傳於世常恐中興以來前輩遺風寂寥莫繼表而出之使學者想故國之喬木識衣冠之盛事云紹熙三年十二月十三日

晁百谷字叙

晁氏子百谷生十年已有成人風去年秣袖書過予儀



矩肅然音吐琅然予固不敢以童子待也明日以父命來求字請字之曰元歸大傳曰大川相屬東流歸海人之於道奚異於是自酒掃應對之末而達之道德性命之理惟識其所歸故也歸與歸與無迷其途有始有卒惟聖門是趨子夏之言焉可証也

### 田燭名訓

伯雨屢請更名父名既從木、實生火命之曰燭仍以伯雨為字古書燭雷光也班孟堅張平子京都賦皆用之李善注一云光明貌一云餘光貌大指則同夫電而雷、而雨然後可以蘇枯澤物燭乎勉旃他日大田氏之門斯不負命名之意也淳熙甲辰十一月十四日雪宴歸醉中書

### 徐大謙名訓

盱江徐次張猶子大倫以族兄名同更名大謙易序卦云有大而能謙必豫大哉謙乎三爻俱吉三爻俱利六十四卦中未有如是之美者蓋思所以稱其名哉紹熙辛亥十月一日省齋

### 李叔軫載之字說

乾道乙酉萬安李世南少虞攜贄過我於永和佳士也後七年承之小宗伯引天下貢士李君在焉名則叔軫



也問其故曰夢而改也他日復問字改乎曰方之予曰軫之方也以象地也考工記雖有是言然方者實輿也軫寔輿後橫木耳舉軫而不言輿得非車主於輿之本於軫乎故一器而工聚焉者車為多車有六等之數而軫四尺為之首也大哉軫乎詎可專論其形之方而已乎宜推其義易字為載之自今以往學問積於中聲譽華其躬是謂材良而器工夫然故可以載道而行遠可以載物而不敗雖微王良造父為之御吾之力自不窮矣君屢請記斯語多故未暇也後二十年退居廬陵君復具本末固請乃追書之紹熙辛亥正月二十一日

循齋說

友人胡李懷之子柯字伯信名齋曰循求予一言予告之曰循者順也若無甚難者然董仲舒在漢儒中弭為知道其論君子自明於天性凡數節然後至於樂循理則循之為義不既大矣乎及其至也顏子嘆夫子之聖亦不過曰循循然善誘人伯信能因董生之言而求夫子之道思過半矣紹熙四年月日

金谿鄉丁說

茶寇久未平數日前大學上舍魁劉堯夫純叟來言撫州金谿縣大姓鄧氏傅氏各有鄉丁數千以朱漆皮笠



冒其首號紅頭子遠近頗畏之號鄧傳二社傳氏已離  
析惟鄧氏子雱者有二子長年三十餘次年二十餘皆  
武勇絕人名應科舉其實假儒耳聞茶寇作即閱習丁  
壯自薦於州先是縣別有陸氏尤豪於一鄉頃年轉運  
司命充都社鄧傳皆隸焉近亦零落獨族人某者行義  
頗著鄉人議使世其職縣亦視諸故府以為當然由是  
鄧氏子意稍怠益懼受制於陸則功不已出也然其家  
僮素輕捷裹紙甲機毒矢善騰越山谷間尚技癢思與  
賊角亦風聲氣俗然也今官軍數為賊困宜命撫守趙  
燧以禮追請諭委用之意仍借補校副尉名目聽自為

一社毋隸陸氏使竟趨贛吉間萬一與大軍遇亦勿使  
相臨第擇郡縣官一人公平有識畧者護其軍并為之  
調糧餉破賊必矣或聞臨川尉靈鑄者常侍其父守英  
州禦蠻有功且重厚可倚否則委趙燧自擇其人可也  
堯夫之言似可信即以告執政明日執政於上前及之  
後數日某對上曰卿前日論撫州民兵甚好但憲所過  
擾人耳亦會辛棄疾誘賊戮之遂不復問姑記其大畧  
淳熙乙未閏月二日



省齋文稿卷二十終



